

T5236.07/4432

53

文翰類選大成

文翰類選大成卷第百三十六詔赦目錄

漢

高帝 三道文帝 八道景帝 二道武帝 五道

宣帝 五道元帝 三道成帝 三道光武 四道

明帝 三道章帝 四道

唐

陸敬輿 二道

宋

建隆登極赦道 盧多遜 一道歐陽永叔道 王禹玉 六道

蘇子瞻 四道范淳父 二道曾子開 二道鄧伯温 一道

王介甫 二道元絳 一道呂晦叔 一道

元

哈佛大學哈佛葉宗
圖書館珍藏印

王鶚 二道 徒單公履 道 李謙 一道 王構 一道

程鉅元 一道 曹元明 一道

文翰類選大成卷第一百三十六 詔赦目錄

文翰類選大成卷第一百三十六

左長史上海李伯璣編輯
紀善慈谿馮厚校正

詔赦類

漢

尊太公曰太上皇詔 高帝

人之至親莫親於父子。故父有天下。傳歸於子。子有天下。尊歸於父。此人道之極也。前日天下大亂。兵革並起。萬民苦殃。朕親被堅執銳。自帥士卒。犯危難。平暴亂。立諸侯。偃兵息民。天下大安。此皆太公之教訓也。諸王通侯將軍群卿大夫已尊朕為皇帝。而太公未有號。今上尊太公曰太上皇。

獄讞詔

獄之疑者。吏或不決。有罪者。久而不論。無罪者。久繫不決。自今以來。縣道官獄疑者。各讞所屬二千石官。二千石官以其罪名當報之所不能決者。皆移廷尉。廷尉亦當報之。廷尉所不能決。謹具為奏。傳所當比律令以聞。

求賢詔

蓋聞王者莫高於周文。伯者莫高於齊桓。皆待賢人而成名。今天下賢者智能。豈特古之人乎。患在人主不交故也。上奚由進。今吾以天之靈。賢士大夫定有天下。以為一家。欲其長久。世世奉宗廟。亡絕也。賢人已與我共平之矣。而不與吾共安利之。可乎。賢士大夫有肯從我游者。吾能尊顯之。布告天下。使明知朕意。御史大夫昌下相國。相國。御史大夫。下諸侯。王。御史中執法。下郡守。其有意稱明德者。必身勸為之。駕遣詣相

國府署行義年。有而弗言。覺免。年老癯病。勿遣。

議犯法相坐詔 文帝

法者治之正。所以禁暴而衛善人也。今犯法者已論。而使無罪之父母妻子同產坐之。及收朕甚弗取其議。朕聞之。法正則民慙。罪當則民從。且夫牧民而道之以善者。吏也。既不能道。又以不正之法罪之。是法反害於民。為暴者也。朕未見其便宜。孰計之。

議振貸及養老詔

方春和時。草木群生之物。皆有以自樂。而吾百姓鰥寡孤獨。窮困之人。或陷於死亡。而莫之省憂。為民父母。將何如其議。所以振貸之。又曰。老者非帛不煖。非肉不飽。今歲首不特使人存問。長老。又無布帛酒肉之賜。將何以佐天下子孫孝養。

其祖。今聞吏。豈當受。鬻者。或以陳粟。豈稱養老之意哉。具為令。

除誹謗法詔

古之治天下。朝有進善之旌。誹謗之木。所以通治道而來諫者也。今法有誹謗。誣言之罪。是使眾臣不敢盡情而上。無由聞過失也。將何以來遠方之賢良。其除之。民或祝詛上。以相約而後相謾。吏以為大逆。其有他言。吏又以為誹謗。此細民之愚。無知抵死。朕甚不取。自今以來。有犯此者。勿聽治。

勸農詔

道民之路。在於務本。朕親率天下農。十年于今。而野不加辟。歲一不登。民有飢色。是從事焉尚寡。而吏未加務也。吾詔書數下。歲勸民種樹。而功未興。是吏奉吾詔不勤。而勸民不明也。且吾農民甚苦。而吏莫之省。將何以勸焉。其賜農民今年租稅之半。

置三老孝悌力田常負詔

孝悌。天下之大順也。力田。為生之本也。一老。眾民之師也。廉。吏民之表也。朕甚嘉此。二三大夫之行。今萬家之縣。云無應令。豈實人情。是吏舉賢之道未備也。其遣謁者勞賜二老。孝者帛。人五匹。悌者力田二匹。廉吏二百石以上。率百石者三。及問民所不便安。而以戶口率置三老。孝悌力田常負。令各率其意。以道民焉。

除肉刑詔

蓋聞有虞氏之時。畫衣冠。異章服。以為戮。而民弗犯。何治之至也。今法有肉刑三。而姦不止。其咎安在。非乃朕德之薄。而

教不明與吾甚自愧。故夫訓道不純而愚民陷焉。詩曰：愷弟君子，民之父母。今人有過，教未施而刑已加焉。或欲改行為善，而道亡繇至，朕甚憐之。夫刑至斷支體，刻肌膚，終身不息，何其刑之痛而不德也。豈稱為民父母之意哉。其除肉刑，有以易之。及令罪人各以輕重不亡，逃有年而免，具為令。

增祀無祈詔

朕獲執犧牲珪幣，以事上帝宗廟。十四年于今，歷日彌長，以不敏不明，而又撫臨天下，朕甚自媿。其廣增諸祀壇，塲珪幣。昔先王遠施，不求其報，望祀不祈，其福右賢左戚，先民後己，至明之極也。今吾聞祠官祝釐，皆歸福於朕躬，不為百姓。朕甚媿之。夫以朕之不德，而專鄉獨美其福，百姓不與焉。是重吾不德也。其令祠官致敬，無有所祈。

議佐百姓詔

間者數年，比不登，又有水旱疾疫之灾，朕甚憂之。愚而不明，未達其咎，意者朕之政有所失而行有過與。乃天道有不順，地利或不得，人事多失和，鬼神廢不享與。何以致此。將百官之奉養，或廢無用之事，或多與。何其民食之寡之也。夫度田非益寡，而計民未加益，以口量地，其於古猶有餘，而食之甚不足者，其咎安在。無乃百姓之從事於末，以害農者蕃，為酒醪，以靡穀者多，六畜之食焉者衆，與細大之義，吾未能得其中。其與丞相列侯吏二千石，博士議之，有可以佐百姓者，率意遠思，無有所隱。

立孝文廟樂武詔 景帝

美聞古者，祖有功而宗有德，制禮樂各有由。歌者所以發德。

也。舞者所以明功也。高廟酎奏武德文始五行之舞。孝惠廟酎奏文始五行之舞。孝文皇帝臨天下。通關梁。不異遠方。除誹謗。去肉刑。賞賜長老。收恤孤獨。以遂群生。減省欲不受獻。罪人不帑。不誅亡罪。不私其利也。除宮刑。出美人。重絕人之世也。朕既不敏。弗能勝識。此皆上世之所不及。而孝文皇帝親行之。德厚侔天地。利澤施四海。靡不獲福。明象乎日月。而廟樂不稱。朕甚懼焉。其為孝文皇帝廟為昭德之舞。以明休德。然後祖宗之功德。施千萬世。永永無窮。朕甚喜之。其與丞相列侯中二千石禮官具禮儀奏。

令二千石脩職詔

雕文刻鏤。傷農事者也。錦繡纂組。害文紅者也。農事傷則飢之本也。文紅害則寒之原也。夫飢寒並至。而能亡為非者寡。

矣。朕親耕。后親桑。以奉宗廟。粢盛祭服。為天下先。不受獻減太官省繇賦。欲天下務農。蠶蠶妻有畜積。以備災害。孺母孺弱。眾母暴寡。若者以壽終。幼孤得遂長。今歲或不登。民食頗寡。其咎安在。或詐偽為吏。吏以貨賂為市。漁奪百姓。侵牟萬民。縣丞長吏也。姦法與盜盜甚。無謂也。其令二千石各脩其職。不事官職。耗亂者。丞相以聞。請其罪。布告天下。使明知朕意。

復高年子孫詔 武帝

古之立教。鄉里以齒。朝廷以爵。扶世導民。莫善於德。然則於鄉里。先耆文。奉高年。古之道也。今天下孝子順孫。願自竭盡。以承其親。外迫公事。內乏資財。是以孝心闕焉。朕甚哀之。民年九十以上。已有受鬻鬻法。為復子若孫。令得身帥妻妾。遂其供養之事。

議不舉孝廉者罪詔

公卿大夫所使總方略壹統類廣教化美風俗也夫本仁祖義褒德祿賢勸善刑暴五帝三王所繇昌也朕夙興夜寐嘉與宇內之士臻於斯路故旅耆老復孝敬選豪俊講文學稽叅政事祈進民心深詔執事興廉舉孝庶幾成風紹休聖緒夫十室之邑必有忠信三人並行必有我師今或至闔郡而不薦一人是化不下究而積行之君子壅於上聞也二千石官長紀綱人倫將何以佐朕燭幽隱勸元元厲蒸庶崇鄉黨之訓哉且進賢受上賞慈賢蒙顯戮古之道也其與中二千石禮官博士議不舉孝廉者罪

令禮官勸學詔

蓋聞導民以禮風之以樂婚姻者居室之大倫也今禮壞樂崩朕甚憫焉故詳延天下方聞之士咸薦諸朝其令禮官勸學講議洽聞舉遺典禮以為天下先太常其議予博士弟子崇鄉黨之化以厲賢材焉

察茂材異等詔

蓋有非常之功必待非常之人故馬或奔踶而致千里士或有負俗之累而立功名夫泛駕之馬跡弛之士亦在御之而已其令州郡察吏民有茂材異等可為將相及使絕國者

止田輪臺等詔

前有司奏欲益民賦三十助邊用是重困老弱孤獨也而今又請遣卒田輪臺輪臺西於車師千餘里前開陵侯擊車師時危須尉犁樓蘭六國子為在京師者皆先歸發畜食迎漢軍又自發兵凡數萬人王各有將共圍車師降其王諸國兵

便罷力不能復至道上食漢軍漢軍破城食至多然士自載
不足以竟師強者盡食畜產言羸者道死數千人朕發酒泉驢
橐駝負食出玉門迎軍吏卒起張掖不甚遠然尚斯留甚衆
曩者朕之不明以軍候弘上書言匈奴縛馬前後足置城下
馳言秦人殺句若馬又漢使者久留不還故興師遣貳師將
軍欲以為使者威重也古者卿大夫與謀參以著龜不吉不
行迺者以縛馬書徧視丞相御史二千石諸大夫郎為文學者
迺至郡屬國都尉成忠趙破奴等皆以虜自縛其馬不祥其
哉或以為欲以見疆夫不足者視人有餘易之卦得大過爻
在九五匈奴困敗公車方士太史治星望氣及太卜龜警皆以
為吉匈奴必破時不可再得也又曰北伐行將於驪山必克
卦諸將貳師最吉故朕親發二師下驪山詔之必毋深入今計

謀封兆皆反繆重合侯得虜候書言聞漢軍當來匈奴使巫
埋羊牛所出諸道及水土以詛軍單于遣天子馬裘常使巫
祝之縛馬者詛軍事也又卜漢軍一將不吉匈奴常言漢極
大然不能飢渴失一狼走千羊迺者貳師敗漢軍士死畧離
散悲痛常在朕心今請遠田輪臺欲起亭隧是擾勞天下非
所以優民也今朕不忍聞大鴻臚等又議欲募囚徒送匈奴
使者明封侯之賞以報忿五伯所弗能為也且匈奴得漢降
者常提掖搜索問以所聞今邊塞未正闌出不禁障候長吏
使卒獵獸以皮肉為利卒苦而塗火之失亦上集不得後降
者來若捕生口虜迺知之當今務在禁苛暴止擅賦力本農
修馬復令以補闕毋乏武備而已郡國二千石各上進畜馬
方略補邊狀與計對

有喪者勿繇事詔 宣帝

導民以孝則天下順。今百姓或遭衰經凶災而吏繇事使不得葬。傷孝子之心。朕甚憐之。自今諸有大父母父母喪者勿繇事。使得收斂送終。盡其子道。

令二千石察官屬詔

獄者萬民之命。所以禁暴止邪。養育群生也。能使生者不怨死者不恨。則可謂文吏矣。今則不然。用法或持巧心。折律貳端。深淺不平。增辭飾非。以成其罪。奏不如實。上亦亡繇。知此朕之不明。吏之不稱。四方黎民將何仰哉。一千石各察官屬。勿用此人。吏務平法。或擅興繇役。飾厨傳稱過使客。越職踰法。以取名譽。譬猶踐薄冰以待白日。豈不殆哉。今天下頗被疾疫。朕甚愍之。其令郡國被災甚者。毋出今年租賦。

益小吏祿詔

吏不廉平則治道衰。今小吏皆勤事而奉祿薄。欲其毋侵漁百姓難矣。其益吏百石以下奉十五。

褒黃霸詔

潁川太守霸宣布詔令。百姓鄉化。孝子弟弟。貞婦順孫。日以衆多。田者讓畔。道不拾遺。養視鰥寡。贍助貧窮。獄或八年亡重罪囚。吏比鄉於教化。興于行誼。可謂賢人君子矣。書不云乎。股肱良哉。其賜關內侯黃金百斤。秩中二千石。潁川孝弟有行義氏。三老力田。皆以差賜爵及帛。

戒不禁姦邪詔

蓋聞上古之治。君臣同心。舉措曲直。各得其所。是以上下和洽。海內康平。其德弗可及已。朕既不明。數申詔公卿大夫務

行寬大順民所疾苦將欲配三王之隆明先帝之德也今吏或以不禁姦邪為寬大縱釋有罪為不苛或以酷惡為賢皆失其中奉詔宣化如此豈不繆哉方今天下少事繇役省減兵革不動而民多貧盜賊不止其咎安在上計簿具文而已務為欺謾以避其課三公不以為意朕將何任諸請詔省卒徒自給者皆上御史察計簿疑非實者按之使真偽毋相亂

議律令詔 元帝

夫法令者所以抑暴扶弱欲其難犯而易避也今律令煩多而不約自典文者不能分明而欲羅元元之不逮斯豈刑中之意哉其議律令可蠲除輕減者條奏惟在便安萬姓而已

初凌勿置縣邑詔

安土重遷黎民之性骨肉相附人情所願也頃者有司緣臣子之義奏徙郡國民以奉園陵令百姓遠棄先祖墳墓破業失產親戚別離人懷思慕之心家有不自安之意是以東垂被虛耗之害關中有無聊之民非久長之策也詩不云虜民亦勞止迄可小康惠此中國以綏四方今所為初陵者勿置縣邑使天下咸安土樂業亡有動搖之心布告天下令明知之

赦天下詔

蓋聞明王之治國也明好惡而定去就崇敬讓而民興行故法設而民不犯令施而民從今朕獲保宗廟兢業匪敢懈怠德薄明晡教化淺微傳不云乎百姓有過在予一人其赦天下賜民爵一級女子百戶牛酒三老孝弟力田帛又曰方春農桑興百姓戮力自盡之時也故是月勞農勸民無使後時今不良之吏覆案小罪徵召證案興不急之事以妨百

姓使失一時之作。亡終歲之功。公卿其明察申救之。

封丙吉後詔 成帝

蓋聞褒功德。繼絕統。所以重宗廟。廣賢聖之路也。故博陽侯吉。以舊恩有功而封。今其祀絕。朕甚憐之。夫善善及子孫。古今之通誼也。其封吉孫中。即將關內侯。是故博陽侯奉吉後。憂郡國災異詔

數救有司。務行寬大。而禁苛暴。訖今不改。一人有辜。舉宗拘繫。農民失業。怨恨者衆。傷害和氣。水旱為災。關東流冗者衆。青幽冀部尤劇。朕甚痛焉。未聞在位有惻然者。孰當助朕憂之。已遣使者。繡行郡國。被災害什四以上。民貧不滿三萬。勿出租賦。逋貸未入。皆勿收。流民欲入關。輒籍內所之郡國。諱遇以理。務有以全活之。思稱朕意。

罷昌陵詔

朕執德不固。謀不盡下。過聽將作大匠萬年言。昌陵三年可成。作治五年。中陵司馬殿門內。尚未加功。天下虛耗。百姓罷勞。客土疏惡。終不可成。朕惟其難。怛然傷心。夫過而不改。是謂過矣。其罷昌陵。及故陵。勿徙吏民。令天下毋有動搖之心。

封卓茂詔 光武

前密令卓茂束身自脩。執節淳固。誠能為人所不能為。六名冠天下。當受天下重賞。故武王誅紂。封比干之墓。表商容之閭。今以茂為太傅。封褒德侯。

議省刑法詔

頃獄多寃人。用刑深刻。朕甚愍之。孔子云。刑罰不中。則民無所措手足。其與中二千石。二千石諸大夫博士議。即議省刑法。

報臧宮詔

黃石公記曰柔能制剛弱能制強柔者德也剛者賊也弱者仁之助也強者怨之歸也故曰有德之君以所樂樂人無德之君以所樂樂身樂人者其樂長樂身者不久而亡舍近謀遠者勞而無功舍遠謀近者逸而有終逸政多忠臣勞政多亂人故曰務廣地者荒務廣德者疆有其有者安貧人有者殘殘滅之政雖成必敗今國無善政災變不息百姓驚惶人不自保而復欲遠事邊外乎孔子曰吾恐季孫之憂不在顯吏且比狄尚疆而屯田警備傳聞之事恒多失實誠能舉天下之半以滅大寇豈非至願苟非其時不如息人

賜周黨帛詔

詔曰自古明王聖主必有不賓之士伯夷叔齊不食周粟太原周黨不受朕祿亦各有志焉其賜帛四十匹

行養老禮詔 明帝

光武皇帝建三朝之禮而未及臨饗眇眇小子屬當聖業聞暮春吉辰初行大射令月元日復踐辟雍尊事二老兄事五更安車輶輪供綏執授侯王設將曾公卿饌珍朕親袒割執爵而酌祝嘏在前祝噎在後升歌鹿鳴下管新宮八佾具備萬舞於庭朕固薄德何以克當易陳負乘詩刺彼己永念慙疚無忘厥心三老李躬年老易學明五更桓榮授朕尚書詩曰無德不報無言不酬其賜榮爵關內侯食邑五千五百二老五更皆以二千石祿養終厥身

引咎詔

朕以無德奉承大業而下貽人怨上動三光日食之變其災

尤大春秋圖讖所為至謹亦思厥咎在予一人群司勉脩職事極言無諱於是在位者皆上封事各言得失帝覽章深自引咎乃以所上班示百官又曰群僚所言皆朕之過人寃不能理吏黠不能禁而輕用人力繕脩宮宇出入無節喜怒過差昔應門失守關雎刺世飛蓬隨風微子所歎永覽前戒竦然兢懼徒恐薄德久而致怠耳

申明車服制度詔

昔魯閔奉親竭歡致養仲尼葬子有棺無槨喪貴致哀禮存寧儉今百姓送終之制競為奢靡生者無檐石之儲而財力盡於墳土伏臘無糟糠而牲牢兼於一奠糜破積世之業以供終朝之費子孫飢寒絕命於此豈祖考之意哉又車服制度恣極耳目田荒不耕游食者衆有司申明科禁宜於今者宣下郡國

尊師傅詔 章帝

朕以眇身託于王侯之上統理萬機懼失厥中兢兢業業未知所濟深惟守文之主必建師傅之官詩不云乎不愆不忘率由舊章行太尉事節卿侯憲三世在位為國元老司空融舉職六年勤勞不怠其以憲為太傅融為太尉並錄尚書事三事大夫莫肯夙夜小雅之所傷也予違汝弼汝無面從股肱之正義也群后百僚勉思厥職各貢忠誠以輔不逮申勅四方稱朕意焉

講議五經同異詔

蓋三代導人教學為本漢承且恭秦襲顯儒術建立五經為置博士其後學者精進雖曰承師亦別名家孝宣皇帝以為去

聖久遠學不厭博故遂立大小夏侯尚書後又立京氏易至
建武中復置顏氏嚴氏春秋大小戴禮博士此皆所以扶進
微學尊廣道藝也中元元年詔書五經章句煩多議欲減省
至永平元年長水校尉儵奏言先帝大業當以時施行欲使
諸儒共正經義令學者得以自助孔子曰學之不講是吾憂
也又曰博學而篤志切問而近思仁在其中矣於戲其勉之哉

禁考獄多酷詔

律云掠者唯得榜笞立又令內箠長短有數自往者大獄以
來掠考多酷鉗鑽之屬慘苦無極念其痛毒怵然動心書曰
鞭作官刑豈云若此宜及秋又令理獄明為其禁

蠲除禁錮詔

書云父不慈子不祗兄不友弟不恭不相及也往者妖言大

獄所及廣遠一人犯罪禁至三屬莫得垂纓仕宦王朝如有
賢才而沒齒無用朕甚憐之非所謂與之更始也諸以前妖
惡禁錮者一皆蠲除之以明棄咎之路但不得在宿衛而已

唐

奉天改元赦

陸敬輿

門下致理興化必在推誠忘已齊人不悛改過朕嗣服丕構
君臨萬邦失守宗祧越在草莽不念率德誠莫追於既往求
言思咎期有復於將來明徵厥初以示天下惟我烈祖萬德
庇人致俗化於和平拯生靈於塗炭重熙積慶垂二百年伊
爾卿尹庶官洎億兆之衆代受亭育以迄于今功存于人澤
及於後肆予小子獲續鴻業懼德不嗣罔敢怠荒然以長於
深官之中暗於經國之務積習易溺居安忘危不知稼穡之

艱難不察征戍之勞苦澤靡下究情不上通事既雍隔人懷
疑阻猶昧省已遂致興戎徵師四方轉運千里賦車籍馬遠
近騷然行齋居送衆庶勞止或一日屢交鋒刃或連年不解
甲冑祝奠之主室家靡依生死流離怨氣凝結力役不息田
萊多荒暴命峻於誅求疲毗空於扞軸轉死溝壑離去鄉閭
邑里丘墟人煙斷絕天譴於上而朕不寤人怨於下而朕不
知馴致亂階變興都邑賊臣乘豐肆逆滔天曾莫愧畏敢行
凌逼萬品失序九廟震怒焉上辱於祖宗下負於黎庶痛心覩
貌罪實在于予永言愧悼若隳荆谷賴夫天地降祐人神協謀
將相竭誠爪牙宣力屏除大盜載張皇維將弘永圖必布新
命朕晨興夕惕惟念茲一向者公卿百僚累抗章疏擬以微
彌加于朕躬固辭不獲一遂與論昨因內省良用矍然一除

陽不測之謂神與天地合德之謂聖願惟淺昧非所宜當文
者所以化成武者所以定亂今化之不被亂是用興豈可更
徇群情苟贊虛美重事不德祇益懷慙自今已後中外所上
書奏不得更稱聖神文武之號夫人情不常係於時化大道
既隱亂獄滋豐朕既不能弘德導人又不能一法齊衆苟設
密網以羅非辜為之父母實增愧悼今上元統曆歲歲發生
宜革紀年之號式敷在宥之澤與人更始用答天休可大赦
天下改建中五年為興元元年自正月一日昧爽以前大辟
罪已下罪無輕重咸赦除之李希烈田悅王武俊李納等有
以忠勞任膺將相有以勲舊繼守藩維朕撫馭乖方信誠靡
著致令疑懼不自保安兵興累年海內騷擾皆由上失其道
下罹其災朕實不君人則何罪屈已弘物予何愛焉庶懷引

慝之誠以洽好生之德其李希列田悅王武俊李納及所管將士官吏等一切並與洗滌各復舊位待之如初仍即遣使分道宣諭朱泚雖與賊泚連坐路遠未必同謀朕方推至誠務欲弘貸如能效順亦與惟新其河南河北諸軍兵馬並宜各於本道自固封疆勿相侵軼朱泚大為不道棄義蔑恩反易天常盜竊名器暴犯陵寢所不忍言獲罪祖宗朕不敢赦其應被朱泚脅從將士官吏百姓及諸色人等有遭其扇誘有迫以兇威苟能自新理可矜宥但官軍未到京城以前能去逆効順及散歸本道者並從赦例原免一切不問天下左降官即與量移近處已量移者更與量移流人配隸及藩鎮効力并緣非犯與諸使驅使官兼別牧諸州縣安置及得罪人家口未得歸者一切放還應先有痕累杜絕反仄逆緣坐承

前恩赦所不該者並宜洗雪亡官失爵放歸勿齒者量加敘叙人之行業或未必兼構大厦者方集於群材建奇功者不限於常檢苟在適用則無棄人况黜免之人沉鬱既久朝過夕改仁何遠哉流移降黜亡官失爵配隸人等有材能著聞者特加錄用勿拘常例諸軍使諸道赴奉天及進收京城將士等或百戰摧敵或萬里勤王扞固全城驅除大患濟危難者其節著復社稷者其業崇我圖爾功特加彝典錫名疇賦永永無窮宜並賜名奉天定難功臣身有過犯滿減罪三等子孫有過犯滿減罪二等當戶應有差科使役一切蠲免其功臣已後雖衰老疾患不任軍旅當分糧賜並宜全給身死之後十年內仍回給家口其有食實封者子孫相繼代代無絕其餘叙錄及功賞條件待收京日並准去年十月十七日十

一月十四日勅處分諸道諸軍將士等。以勤扞禦累著功勳。方鎮克寧。惟爾之力。其應在行營者。並超三資與官。仍賜勳五轉。不離鎮者。依資與官。賜勳三轉。其累加勳爵。仍許回授。周親。內外文武官三品已上。賜爵一級。四品已上。各加一階。仍並賜勳兩轉。見危致命。先哲攸貴。掩骼埋胔。禮經所先。雖效用而或殊。在惻隱而何間。諸道兵士有死王事者。各委所在州縣。給遞送歸本管官為葬。其有因戰陣殺戮。及擒獲伏辜。暴骨原野者。亦委所在。逐近便收葬。應緣流貶及犯罪未葬者。並許其家各據本官品。以禮收葬。自頃軍旅所給。賦役繁興。吏因為姦。人不堪命。咨嗟怨苦。道路無聊。汔可小康。與之休息。其墊陌及稅間架。竹木茶漆。權鐵等諸色名目。悉宜停罷。京畿之內。屬此寇戎。攻劫焚燒。靡有寧室。王師仰給。

人以重勞。持宜減放。今年夏稅之半。朕以兇醜犯闕。遽用干征。爰度近郊。息駕茲邑。軍儲克辦。師旅攸寧。式當寢旌。以志吾過。其奉天宜升為赤縣。百姓並給復五年。尚德者教化之所先。求賢者邦家之大本。永言茲道。夢想勞懷。而澆薄之風。趨競不息。幽棲之士。寂寞無聞。蓋誠所未孚。故求之未至。天下有隱居行義。才德高遠。晦跡丘園。不求聞達者。委所在長吏。具姓名聞奏。當備禮邀致。諸色人中有賢良方正。能直言極諫。及博通墳典。達於教化。并洞識韜鈴。堪任將帥者。委當叅官及所在長吏聞薦。天下孤老鰥寡。惻獨不能自活者。並委州縣長吏量事優恤。其有年九十已上者。刺史縣令就門存問。義夫節婦。孝子順孫。旌表門閭。終身勿事大兵之後。內外耗竭。食省用宜。自朕躬當節乘輿之服。御絕宮室之華。

師率已師儉為天下先諸道貢獻自非供宗廟軍國之用一切並停應內外官有冗員及百司有不急之費委中書門下即商量條件停減聞奏布澤行賞抑惟舊章今以餘孽未平帑藏空竭有乖慶賜深愧于懷赦書有所未該者委所司類例條件聞奏敢以赦前事相言告以其罪罪之亡命山澤挾藏軍器百日不首復罪如初赦書日行五百里布告遐邇咸使聞知。

貞元改元大赦

門下王者體元立極欽若乎天地纂業承統嚴奉于祖宗用能百神允諧兆庶求賴立國之本斯其大經朕燭理不明違道招損往遭多難淪陷國都天地宗祧曠而莫主則是欽若嚴奉之義缺矣甚用懼焉洎復京師遽將告謝有司以人力

耗數禮物廢墮日居月諸歲聿云暮卜其吉日俯在上春於心永懷坐以待曙而百辟卿士抗疏上言咸謂人心未寧不足以盡敬寇孽猶在不足以告功迫於群情俯抑誠願郊廟孔邇瞻言莫從悼心慚頽胡寧自處重以和平未洽災沴荐臻去歲旱蝗兩河為甚人流不息師出靡居加之以徵求因之以荒饑困窮殍餒轉死丘墟關輔之間冬無積雪土膏未發宿麥不滋詳思咎徵有為而致兵戎之後餘孽尚存獄犴之中深冤未釋又河中淮右逆將阻兵汙脅齊人陷之死地雖欲自雪厥路無由抱義銜冤足傷和氣此皆由朕棄德播災于人為之父母實用愧耻今玄陰已謝春日載陽夕萌畢伸幽蟄咸震思與海內同心自新發號更元用符天意宜改興元二年為貞元元年自正月一日特與已前大辟罪已下

已發覺未發覺已結正未結正繫囚見徒罪無輕重咸赦除
之先准勅令量移收叙人所司據節文速與處分應河中脅
從將士多是奉天赴難功臣本居朔陲風尚忠節豈以一夫
誑誤棄其累代勲庸朕於此軍尤所不忍特宜洗滌以待初
誠自非與官軍決戰死於鋒刃其餘雖臨陣擒獲亦從釋放
棄逆歸順者在身先有官爵實封一切如舊仍准前後勅所
在便給賞錢并與甄叙如有困危効節建立殊庸量其事績
特加獎擢李懷光若能翻然悔過束身赴朝念其嘗有大勲
必當終始全護仍准前勅授之官封朕於功臣廢亦無負准
西將吏百姓等皆被劫制久為匪人詢事原情諒非獲已今
主師四合計日誅夷玉石俱焚用增惻憫宜令諸道進軍之
日唯存首惡一人自餘徒黨悉從原宥如有歸順及立功者

准河中將士例獲獎夫為國之要在於審官共理分憂守
宰彌切闔境性命繫乎其人將使四閭無愁苦之聲風俗興
廉讓之教得不慎東髦彥寄之化源自今已後諸州刺史有
闕中書門下於朝官中精擇有理人才術者授之如刺史縣
令在任頻年課績尤異者擢授侍郎給舍郎官御史中外迭
處用觀其能賞罰必行期於競勸自頃選曹署吏唯以書判
求人務騁浮華莫稽實行且能言者不必適用蘊用者或不
能言尤為擇人其在精覈宜令清資常參官每年於吏部選
人中各舉所知一人堪任縣令錄事參軍者所司依資叙注
擬便於甲曆之內具標舉主名銜仍牒報御史臺如到任後
政尤異者有贓犯事跡著明者所司錄舉官姓名聞奏以為
褒貶其內外負及京城諸使名目委御史審勘會商量并省

停賦仍集百寮定議務從簡約息費使人其京官職田及息
利官錢等黠吏詆欺移易疆畔或貧人轉徙捕繫親隣日月
滋深耗弊彌甚亦令百寮議其折衷擇善而行往以賦役殷
繁人不堪命定為兩稅事額易從比屬軍興或踰始制法無
所守吏益為姦哀我勞人汙可小息自諸道州府除兩稅外
應有權宜科率差使一切悉停京畿及近縣所欠百姓和糴
價直委度支郎勘會支給諸道非臨寇賊州縣自冬已來黠
及官健子弟並宜放散任營生業應經陷賊州縣百姓屋宇
被焚毀并貧病老弱及遭傷損之類所在量加優恤使得安
存天下名山大川并自古聖帝明王賢臣烈士祠廟墳墓各
委當處長吏擇日致祭必資精潔以達志誠班制有差所以
序賢也廩秩有等所以明勸也今或高卑失序中外相踰至

於卿士之家尚懼凍餒一患忠信重祿豈其然耶內外官祿
及俸錢手力雜給等委中書門下度支即參詳定額聞奏應
赴奉天及收城將士等並功存社稷節著艱危中心藏之豈忘
酬報頃緣府藏空竭賞給未周乃眷勲臣實用增愧應准元
勅合請賞錢人委所司節減在官及百司費用據所有財物
速與給付應在京城及諸道立功將士等先有詔旨並許甄
升所司勘會淹歷時月委中書門下即准元勅處分諸軍行
營并河中朝邑被脅從將士家口在京及諸州府者宜令本
道節度觀察使安存賑恤各令優給應諸軍使立仗見在城
將士等共賜七萬匹制書有未該備所司速皆類條件聞奏
敢以赦前事相言告者以其罪罪之忘命山澤挾藏軍器百
口不首復罪如初赦書日行五百里遐邇咸知

宋

建隆登極赦文

五運推移。上帝於焉捲命。三靈改卜。王者所以膺圖。朕起自側微。備嘗艱險。當周邦草昧。從一帝以徂征。洎虞舜陟方。翊嗣居而篡位。但罄一心而事上。敢期百姓之與能。屬以北虜侵疆。邊民惟苦。朕長驅禁旅。往殄胡塵。鼓旗纒出於國門。將校共推於天命。迫迴京闕。欣戴眇躬。幼主以曆數有歸。尋行禪讓。兆民不可以無主。萬機不可以曠時。勉徇羣心。已登大寶。昔湯武革命。發大號以順人。唐漢開基。因始封而建國。官國號大宋。改周顯德七年為建隆元年。乘時撫運。既叶於謳謠。及物推恩。宜周於華夏。可大赦天下。於戲。革故鼎新。景命初隆。於王室。普災肆赦。鴻恩普洽。於民心。更賴將相王公。協謀同力。共裨寡昧。以致升平。凡爾萬方。咸知朕意。

辛酉京詔

蠶多繇

定鼎洛邑。我之西都。燔柴泰壇。國之大事。况削平江表。底定南方。惟率土之混同。自上天之鑒祐。內慙涼德。感是洪休。得不罄以恭虔。申其告謝。睠惟京而西顧。兆陽位於南郊。豆籩陳有楚之儀。黍稷奉惟馨之薦。朕今暫幸西京。取四月內。選日有事於圓丘。宜令有司各揚其職。禮容儀衛。典故在焉。祇事肅成。無或煩擾。諸道州府。不得以進奉為名。輒有率斂。凡在中外。當體予懷。

通商茶法詔

歐陽永叔

古者山澤之利。與民共之。故民足於下。而君裕於上。國家無事。刑罰以清。自唐末流。始有茶禁。上下規利。垂二百年。如聞

比來為患益甚。民被誅求之困。日惟咨嗟。官受濫惡之入。歲以陳積。私藏盜販。犯者寔繁。嚴刑峻誅。情所不忍。使田間不安。其業商賈不通。于行嗚呼。若茲是於江湖間。幅員數千里。為陷穿以害吾民也。朕心惻然。念此久矣。間遣使者往就問之。而皆謹然。願弛權法。歲入之課。以時上官。一二近臣。件析其狀。朕嘉覽于再。猶若慊然。又於歲輸。裁成其數。使得饒阜。以相為生。刻去禁條。俾通商賈。歷世之弊。一旦以除。著為經常。弗復更制。損上益下。以休吾民。尚慮喜於立異之人。緣而為姦之黨。妄陳奏議。以惑官司。必實明刑。用戒狂謬。布告遐邇。體朕意焉。

賜觀文殿學士禮部尚書王舉正不允詔

夫朝廷之廣大。賢雋之衆多。必有儲然耆壽之臣。以當上。優禮之異。或事忠所訪。則有老成俾時之式。瞻以為人望。禮雖七十。猶有不得謝者焉。卿懿文高行。有君子之風。清操令聞。為當世所重。閱書秘殿。日侍清閑。進讀經筵。坐論道德。固非有官司之責。筋力之勞。宜思少安。副我眷待。

賜夏國主詔

朕嗣守丕圖。日新庶政。方推大信。以協萬邦。思與藩屏之臣。永遵帶礪之約。矧勤王而述職。固弈世以推誠。而近年以來。將命之使。或不體朝廷之意。罔循規矩之常。多於臨時率爾。改作。既官司之有守。致事體以難從。且下脩奉上之儀。本期効順。而君有錫臣之寵。所以隆恩。豈宜一介於其間。輒以多端而生事。在國家之撫御。固廓爾以無疑。想忠孝之傾輸。亦豈欲其如此。故特申於旨。諒深認於眷懷。今後所遣使人。

更宜精擇。不令妄舉。以紊彝章。所有押賜押伴使臣等。亦已嚴行戒勵。苟有違越。必寘典刑。載惟信誓之文。炳若丹青之著。事皆可守。言貴弗違。毋開間隙之前。庶敦悠久之好。

求直言詔

韓持國

朕涉道日淺。掩于致治。政失厥中。以干陰陽之和。乃自冬迄春。旱暵為雪。四海之內。被災者廣。間詔有司。損常膳。避正殿。冀以塞責。消變。歷日滋久。未蒙休應。嗷嗷下民。大命近止。中夜以興。震悸靡寧。未惟其咎。未知攸出。意者朕之聽納。不得於理。歟。獄訟非其情。歟。賦斂失其節。歟。忠謀讜言。鬱於上聞。而阿諛壅蔽。以成其私者。衆歟。何嘉氣之久不效也。應中外文武臣寮。並許寔封直言。朝政闕失。朕將親覽。若求其當。以輔政理。三事大夫。其務悉心。交儆。成朕志焉。

為雨災許言時政闕失詔

王禹玉

蓋聞古之聖賢在位。陰陽和風雨時。日月光星辰靜。黎民阜蕃。以底休平。朕甚慕之。朕猥以眇身。託于王公之上。夙夜以思。惟懼不能。以承先帝鴻業。而比年以來。水潦為沴。迺八月庚寅。大雨。京師室廬。墊傷被溺者衆。大田之稼。害于有秋。竊迹災變之未。曾不虛發。豈朕之不敏於德。而不明於政歟。將天下刑獄滯寃。賦繇煩苦。民有愁歎。亡聊之聲。以奸其順氣歟。不然。則何天戒之甚也。今飭躬焦思。欲銷復大異。而未聞在位者之忠言。進析自新。厥路何繇焉。應中外臣寮。並許上實封。言時政闕失。及當世之利病。可以佐元元者。悉心以陳。毋有所諱。執政大臣。皆朕之股肱。其協德交修。以輔朕之不逮。

封太祖皇帝後詔

昔我藝祖皇帝之興。以天發之期。兵未始一血刃。而卒再建
區夏。其大謀盛烈。被諸萬世。而莫高焉。朕奉承聖緒。夙夜不
敢康。乃顧後之子孫。寔微弗顯。而有司未嘗議封爵之文。豈
朕所以尊大統。推親親之意哉。且積厚者其流遠。施大者其
報豐。宜令中書門下考大宗之籍。以屬近而行尊者一人裂
土地。而王之。使常從獻于郊廟。世世勿復絕。

賜吳奎免恩命不允詔

天子惟君萬邦。建時百辟。以祗迪于乃事。矧曰左右之臣。以
朝夕承義。乃辟予敢有弗欽。爾克懋乃猷。茲庸命爾圖致政。
爾乃陳所以固辭。朕命者三。朕思有虞之世。羣臣皆讓。亦莫
安厥位。終敕之曰。俞。汝往哉。爾弗述聞于前人。其率時訓。惟
厥中。嗚呼。慎爾止。毋倚乃身。乃罔弗孚于休。

賜判亳州富弼乞罷使相不允詔

朕初臨丕基。首撰大吏。方勞精而共務。忽引疾以屢辭。去雖
喻於歲年。念不舍於朝夕。適覽奏函之說。又將使袞之還。且
重祿所以賦上賢。樂郡所以優舊德。宜收曲慮。終保高名。

嘉祐明堂赦

朕承三聖之基。履四海之貴。深惟持國之日久。益念為君之
道難。有臨聽之瘡。庶以圖天下之佚。無奉養之靡。庶以資天
下之豐。兢兢萬務之維微。勉勉前事之所戒。倚以左右。輔弼
之正。予敢有弗欽。事于上下。神祇之明。予敢有弗肅。屬九穀
登富。三辰昭華。象來桂海之祥。塵絕玉關之警。有邦之應。於
朕豈功。恭念為天之子者。必修報本之禮。為人之子者。必懷
追養之慕。重循菲德。屢緝曠文。頃按明堂之圖。古如路寢之

制載經斯室。載度斯筵。直大火之駢芒。乘季秋之肅氣。物無上帝之稱。非躬祠不足。昭虔虔。聖維文考之尊。非嚴配不足。盡虔孝於時。備法物之駕。服大冕之章。格靈貺於真庭。欵清德於太宇。還祇宗祀之舉。具飭純誠之將。迺神光陸離。燭于薦鬯之夕。喜氣休晏。被于燎柴之時。亶丕事之維成。敢蕃釐之專鄉。宜孚迂渙。以契天心。可大赦天下。於戲。承神之胙。既均輝耀之微。盪俗之瑕。復若風霆之布。蓋禮鉅則擇之博。孝至則勸以遐。尚賴秉文之英。經武之傑。屬同寅於王室。壯大治於邦圖。共荷無疆之休。亦膺無窮之聞。

治平立皇太子赦

王者承天立極。莫不思長世之圖。為國建儲。所以止萬邦之本。故朕親先父子。而天下不以為愛命。發朝正而天下

為私。粵予上嗣之良。稟自日濟之聖。出而就傳。寢窮學肆之聞。入則承顏。勤至寢門之問。比疏榮於王社。益修德於天枝。顧荷丕基之艱。猶虛正體之貳。矧漢文命嫡。著於即祚之初。年且夏后立子。期以傳家於萬世。維羣元之所後。維大器之所承。式符少海之祥。宜踐東朝之位。肆顯冊之丕發。嘉僉言之大同。爰契歡心。用覃曠澤。可大赦天下。於戲。文昭武穆。夙詒燕後之謀。震長離明。本有承華之象。蓋義重禋先者。禮必亟舉。慶施禱上者。惠必遐流。咨爾庶方。當體朕意。

賜阿里骨詔

蘇子瞻

惟爾祖先。世篤忠孝。本與夏賊。日尋干戈。亦惟恃我朝廷。爵秩之隆。用能保爾子孫。黎民之衆。肆朕命爾嗣長。乃師而承襲。以來強酋外擅。爾弗能禁。恣其所為。遂據洮城。以犯王略。

陰連夏賊。約日盜邊。朕愍屬羌之無辜。出偏師而問罪。元惡俘獲。餘黨散亡。山後底平。河南綏服。朕惟率首豪而捍疆場。乃爾世功。叛君父而從仇讎。豈其本意。庶能改過。未忍加兵。果因物以貢誠。湏洗心而效順。爾既知悔。朕復何求。已指揮燕河路。更不出兵。及除已招納到部族外。住罷招納。依舊許般次往來買賣。及上京進奉。爾宜約束種類。共保邊陲。期寵祿於有終。知大恩之難再。勿使來疑。復為虛言。

賜新除落致仕依前光祿大夫范鎮赴闕詔

夫有德君子。以精神折衝。壁口之麟鳳。能服猛鷲。朕虛懷前席。以致諸老。非敢必以事諉也。苟得黃髮之叟。皤然在位。則朝廷尊嚴。姦宄消伏。卿雖篤老。乃心王室。母憚數舍之勞。以副中外之望。

賜正議大夫知鄧州蔡確乞量移弟碩允詔

以義責備。春秋有失教之譏。以情內恕。詩人有將婦之念。碩之得罪。事在有司。難以貴近之親。而廢朝廷之典。及觀來請。有既予心。重違兄弟急難之詞。以傷人子奉養之意。

賜端明殿學士銀青光祿大夫致仕范鎮獎諭詔

朕惟春秋之後。禮樂先亡。秦漢以來。韶武僅在。散樂工於河海之上。往而不還。聘先生於齊魯之間。有莫能致。魏晉以下。曹鄴無譏。豈徒鄭衛之音。已雜華戎之器。間有作者。猶存典刑。然銖黍之一差。或宮商之易位。惟我四朝之老。獨知五降之非。審聲知音。以律生尺。覽詩書之來上。閱箕虞之在廷。君臣同觀。父老太息。方詔學士大夫論其法。工師有司考其聲。上追先帝移風易俗之心。下慰老臣憂君憂國之志。究觀所

作嘉歎不忘

合祭天地詔

范淳父

朕聞五帝不相沿樂三王不相襲禮世有損益因時制宜惟我祖宗嚴奉郊廟當遣官攝事皆考合於前文唯奠玉親祠自裁成於大禮每以三歲對越二儀咸秩百神大賚四海迄先帝元豐之末講方立特祭之儀蓋將補一代之闕容振百王之墜典朕惟菲德嗣守丕基列聖已行謹當遵奉先朝未舉懼不克堪是以昔歲仲冬竭誠大祀神祇饗答祖考燕寧前詔有司載加集議猶欲咨度諸儒之論稽參六藝之文然理既不疑則事無可議斷自朕志協于僉言祇率舊章永為成式今後南郊合祭天地元祐七年例施行仍罷禮部集官詳議

賜觀文殿大學士集賢觀使蘇頌乞致仕不允詔
祖宗以來貴德尚齒鼎槐之老莫不眷留班于大廷表儀百辟卿甸繇省轄進涖宰司深執勞謙懇求去位置使祠館勉徇雅懷已退處於立園尚何殊於田里矧卿筋力克壯聰明不衰中外所瞻足以重國體茲至意無或費辭

元符日食求言詔

曾子開

朕以眇身始承天序任大責重罔知攸濟求惟四海之遠萬幾之煩豈予一人所能徧察必賴百辟卿士下及庶民敷奏以言輔予不逮矧太史前告天將動威日有食之期在正月變異甚鉅殆不虛生夙夜以思未燭厥理將以彌綸初政消弭天菑非藥石之規孰開朕聽況今周行之內人有所懷芻蕘之中言亦可採凡朕躬之闕失若左右之忠邪政令之否

臧風俗之熾惡。朝廷之德澤。有不下究。閭閻之疾苦。有不上聞。咸聽直言。母有忌諱。朕方開讜正之路。消壅蔽之風。其於鯁論嘉謀。唯恐不聞。聞而行之。唯恐不及。其言可用。朕則有賞。言而失中。朕不加罪。朕言惟信。非事空文。尚悉乃心。母悼後害。應中外臣僚。以至民庶。各許實封言事。在京於合屬處投進。在外許於所在州軍附遞。以聞。布告。邇遐咸知朕意。

賜新除觀文殿大學士中太一宮使范純仁令赴闕

供職詔

卿二朝元老。四海具瞻。出處為邦國之重輕。用舍繫仁賢之消長。久置散地。宜還本朝。俾陟降於殿帷。仍總司於琳館。豈惟尊德尚齒。昭示寵優。庶幾鯁論嘉謨。日聞忠告。昔周公已老。猶在京師。留侯雖病。不去漢室。眷惟籍稱異世。同心聞命。

疾馳副朕所望

元豐立皇太子赦

鄧伯溫

父子一體也。惟立長可以圖萬世之安。國家大器也。惟建儲可以係四海之望。位序蚤定。而人莫不以為悅典禮。至崇而衆罔敢以為私。求惟上嗣之賢。寔有妙齡之譽。入而視。稽孝友見於夙成。出則好書。聰哲繇於自得。粵紹休於正統。猶虛位於東朝。廼考著龜之占。廼稽方冊之實。載洵吉日。肇闢青宮。周家先親。不敢忘廟社之重。夏后與子。蓋以順天人之心。宜覃曠恩。徧暨群品。可大赦天下。於戲。離明震長。縣帝緒於億年。解吉渙身。灑天仁於萬物。蓋禮之所行者大。則澤之所流者深。咨爾多方。體朕至意。

賜知亳州歐陽脩乞致仕不允詔二道 王介甫

股肱名臣與國同體禮當得謝朕尚難之況年非告老之時而數在受遺之籍不留屏輔人謂斯何姑體至懷少安厥位卿數德之舊簡在帝心從容一州足以休養而抗奏至於四五必以田里為歸豈朕視遇故老有不足於禮乎何其求去之果也欲喻至意莫知所言惟能勉留實副勤佇

賜荅曾公亮詔

青裁變異以成人君推之股肱朕所不敢元勳舊德實賴交脩謹告之來必緣象類明諭朕志使當天心庶幾君臣並受遐福不務出此而果於辭權是惟保身豈曰謀國

熙寧七年南郊大赦

元絳

王者鈔崇神天嚴奉宗祏就郊以饗所以詔天下之恭假廟而烝所以教天下之孝洪惟五聖之烈誕膺日王之文肆予冲人昭事上帝載念物無以稱維一誠可以展大報之儀祭不欲煩維三歲可以述躬行之典協會康年之順道迎至日之長是用朝薦殊庭裸將大室乃進登於陽時以衷對於皇穹合祛柔祗陟配文祖祝祿告絜贊儀尚純六樂變音舞奏而諸物至二精揚燎煙升而萬靈交方丕事之獲成敢蕃禧之專嚮宜專大號以資多邦可大赦天下於戲意畫精禋既秩宗祈之舉政施惠術亶昭慶宥之行維時黎元綏我德澤尚賴謨明四近忠蓋羣材儀圖新美之功勩相隆平之運同底于治永享厥休

賜宰臣韓琦請郡不允詔

呂晦叔

夫忘身徇國者前志之所高送往事居者人臣之所勉顧惟寡昧矧在亮陰永言負荷之艱實賴股肱之助荐披來奏頗

異予聞謂已事於山園必聽辭於機柄雖末代或爾在本朝則無唯天聖之初馮拯去位非緣使領而獲罷蓋以疾疢之匪任卿體力素強望實兼劭所宜遺履謙之近節懋經國之遠圖深體至懷勉緩厥位。

元

中統元年五月赦

王鶚

我國家烈祖肇基先皇繼統惟圖日闢於疆宇未免歲耀於兵威事有當為特難處已朕獲承丕祚已降德音念士卒暴露者久之而人民離散者多矣干戈載戢田里俾安不期同氣之中俄有鬪墻之侮顧其中幼敢啓茲謀皆被姦讒相濟以惡彼既階於禍亂此當應以師徒朕惟父老兄弟之親宗廟社稷之重遣使敷諭至于再三亂紀執迷曾無少革以致宗族共怒戊甲乃興重念兵方弔而復徵民甫休而再擾心疑未釋反側不安詿誤者至及於無辜拘囚者或生於不測非朕本意盡然傷心宜推曠蕩之恩普示哀矜之意於戲悛心或啓忌加管蔡之刑內難既平廷績成康之治。

賜高麗國王曆日詔

諭高麗國王植獻歲發春式邁三陽之會對時育物宜同一視之仁睠爾外邦忠於內附肇因正旦庸展賀儀方便介之還歸須筴書之播告今賜卿中統五年曆日一道卿其若稽古典敬授民時勸彼東嶠之氓勤於南畝之事茂迎和氣迄用康年時乃之休惟朕以憚。

建國號詔

徒單公履

誕膺景命奄四海以宅尊必有美名紹百王而紀統肇從隆

古匪獨我家。且唐之為言。蕩也。堯以之而著稱。虞之為言。樂也。舜因之而作號。馴至禹興而湯造。互名夏大以殷中。世降以還。事殊非古。雖乘時而有國。不以義而制。補為秦。為漢者。蓋從初起之地名。曰隋。曰唐者。又即始封之爵邑。是皆循百姓見聞之徂習。要一時經制之權宜。繁以至公。得無少駭。我太祖聖武皇帝。握乾符而起朔土。以神武而膺帝圖。四振天聲。大恢土宇。輿圖之廣。歷古所無。頃者。耆宿詣庭。奏章伸請。謂既成於大業。宜早定於鴻名。在古制以當然。於朕心乎何有。可建國號曰大元。蓋取易經乾元之義。茲大治流行於庶品。觀名資始之功。予一人底寧於萬邦。尤切體仁之要。事從因革。道協天人。於戲。稱義而名。故匪為之。溢美乎休。惟永尚不負於投艱。嘉與敷天。共隆大號。

清冗職詔

李謙

惟我祖宗肇造區夏。雖中書已嘗建立。而官制未暇舉行。迨予圖大。以宅中思。欲繼志而述事。集儒臣之公議。法前代之彝章。爰立省部院臺。以正朝廷綱紀。自疆土極。照臨之遠。而省臺有內外之分。日益月增。官冗人濫。嘗勅有司而澄汰。意能舊制之傳承。比聞近待之言。謂益曩時之弊。彼不勝重任。有壅上聞。苟尚蹈匪彝。時惟予咎。其清冗職。用復前規。於職官不必備。惟其人。朕恪守已成之憲。爾世克勤于乃事。卿永有圖報之心。

興師征江南諭行省官軍詔

王構

爰自太祖皇帝以來。彼宋與我使介交通。非一次。彼此曲直之事。亦所共知。不必歷舉。迨我憲宗之世。朕以藩職奉命。

南伐師次鄂渚彼賈似道遣宋京詣我近臣博都歡前河南
路經略使趙璧請罷兵息民願奉歲幣于我朕以國之大事
宗親在上必雖入計用報而還即位之始追意是言乃命翰
林侍講學士郝經等奉書往聘蓋為生靈之計也古者兵交
使在其間惟和與戰且嗣報音其何與於使哉而乃執之卒
不復命至如留此一二行李於此何損於彼何益以致師出
連年邊境之間死傷相藉係累相屬皆彼宋自禍其民也襄
陽被圍五年旅拒王師義當不貸朕先有成命果能出降許
以不死是既降附之後朕不食言悉全其命冀宋悔過或啓
令圖而乃迷執罔有悛心所以問罪之師有不能已者今遣
爾等水陸並進爾等當布告遐邇夫以天下為事爰及干戈
古有之無華之民初無與焉若然界軍民官吏人等去逆

效順與眾來降或別立奇功者論等第官資遷擢其所附
民宜嚴勅將士毋得妄行殺掠父母妻孥家口毋致分散仍
加賑給令得存濟其或固拒弗從及迎敵者俘戮何疑

行科舉詔

程鉅夫

惟我祖宗以神武定天下世祖皇帝設官分職徵用儒雅崇
學校為育才之地議科舉為取士之方規模宏遠矣朕以眇
躬獲承丕祚繼志述事祖訓是式共稽三代以來取士各有
科目要其本末舉人宜以德行為首試藝則以經術為先詞
章次之浮華過實朕所不取爰命中書參酌古今定其條制
其以皇慶三年八月天下郡縣舉其賢者能者充賦有司次
年二月會試京師中選者朕將親策焉於戲經明行修庶得
真儒之用風移俗易益臻至治之隆

諭安南國詔

曹元明

諭安南國世子陳日煬我國家誕膺景命撫綏萬邦德澤普
加靡間夷夏乃者先朝奄棄臣民朕以裕皇嫡孫為宗戚大
臣之所推戴爰自太祖皇帝肇基之地入承天叙於至治三
年九月四日即皇帝位遂以甲子歲為泰定元年今遣亞中
大夫交部尚書馬合謀奉議大夫禮部郎中楊宗瑞資詔往
諭爾國賜爾授時曆一帙惟乃祖乃父脩貢內附有年集我
國家遇卿甚厚以占城守臣上表稱州之邊吏累發兵相侵
朕為之惻然于中不知卿何為至是豈信然耶朕君臨天下
視遠猶邇務輯寧其民俾各得其所矧其體予至懷戒飭下
衆慎保人民俾毋忘爾累世忠順之恩

類選大成卷第百三十七制誥目錄

蘇廷碩二道 賈幼隣一道 李臣山一道 李虞仲一道

李公垂一道 白樂天二道

宋

李太初一道 劉原甫五道 蔡君謨一道 王禹玉四道

胡武平二道 歐陽永叔三道 張方平三道 司馬君實一道

范景仁一道 蘇子瞻十道 劉貢甫二道 鄧潤甫三道

呂晦叔一道 鄭毅夫二道 蘇子由四道 王介甫六道

元絳二道 錢總一道 李邦直二道 曾子宣一道

曾子固二道 曾子開四道 梁燾一道 孫巨源一道

呂陶一道 王震二道 張閣一道 沈文通二道

鄒志完 一首

元

下之綱 一道 李樂 二道 謝端 二道 姚端夫 五道

虞伯生 一道 趙子昂 一道 元復初 二道 吳幼清 一道

王構 五道 張士觀 二道 霍希賢 一道 楊果 一道

閻子靜 六道 劉元 一道 鄧善之 一道 袁伯長 一道

盧旦 一道 王繼學 一道 李端 一道 宋誠夫 一道

程鉅夫 一首

文翰類選大成卷第一百二十七制誥目錄

文翰類選大成卷第一百二十七

左長史上海李伯璣編輯

紀善慈谿馮厚校正

制誥類

唐

姚崇等代制

蘇廷碩

黃門朕聞上古聖王之政理則教之以戰陳之以兵蓋威不
龔而服不順也故始於禁暴終於偃革斯不得已而用之朕
以寡昧誕膺鴻業思欲率於動靜歸之教化豈要荒之外棄
為匪人而亭育之中視則如子罔不遵我文軌修其貢賦歲
時相均善道路抵屬而默啜素稱桀鷲鳴鏑於狼居頌日懷柔
屢書於象魏朝廷所以許其通好議以和親使臣累齎綰帛

侍子令龍冠帶。中國無事。長城罷守。戢干戈而銷劍戟者。朕之意焉。豈謂我盟不渝。爾約斯背。伊庭之際。遂敢侵軼。西北偏隅。尚聞嘯聚。雖摧其精銳。而困於圍逼。此不虞之失也。朕甚憐之。犬羊無親。不可恃信。而輕敵。能寵有勇。威能宣威。而制勝。朕由是詢卿士之奏。攬英雄之心。謀元帥而得佐軍。恢遠圖而舉長策。隨時之義。其在豫乎。兵部尚書兼紫微令。監修國史。上柱國。梁國公。姚崇。天降其才。日新厥德。禮義為本。君有四鄰。譽猷是先。坐知千里。以仲山甫之操。管夷吾之能。智湧泉而不窮。精貫日而愈勵。信廟堂之柱石。鼎鼐之鹽梅。必能奮爾六奇。先我三傑。可持節靈武道行軍大勳管。管內諸軍。咸受節度。右領軍衛大將軍兼檢校單于大都護。鎮守軍使張知運。寬厚沉毅。外方內直。威而勇決。自攝單于之

臺。惠則撫循。咸仰將軍之樹。可中軍副大勳管。權檢校原州都督。李欽。憲家承將相器。兼文武。求古人之節。臨事不回。讀前史之言。好謀而斷。可左軍副大勳管。檢校左威衛將軍。靈州都督。呂休璟。慣知邊要。父探戎律。誠期報國。去病安用。家為奮不顧身。伯昭不持賊遺。可右軍副大勳管。左驍衛將軍。論弓仁。右金吾衛大將軍。勿部。均左領軍衛。郎將攝木衛。將軍張直。楷單于副都護。臧懷亮。右領軍衛中郎將。王海賓。前朔州刺史。劉元楷。右武衛郎將。陽楚客。并州定清府果毅。元蕭然等。頗牧為用。關張其敵。懷才倜儻。嘗邀百勝之功。立志經營。備習九章之訓。弓仁。盡珣。並可前鋒。物管。直楷。可左虞候。物管。懷亮。可右虞候。物管。海賓。元楷。楚客。蕭然等。並可行軍。物管。太僕少卿。田崇。壁。鄜州刺史。韓思復等。強力從政。精

心在公知無不為利有攸往入敷事典省閣稱其閑練出綜
條察吏人畏其嚴明崇壁可兼行軍長史恩復可兼行軍司
馬兵部郎中李休光司勳郎中張敬忠兵部員外郎王上客
刑部員外郎楊欽明江州別駕李崑等或特達珪璋所謂登
壇之寶或翩翩書記曾聞及露之詞可以光贊出車弘宣入
幕並可行軍判官靈武軍兵加滿十萬人舊馬既少宜於內
外開廐抽壯馬添滿陸萬疋原夏等州要害處亦量加馬其
後軍兵六萬人馬二萬疋先來點定宜令衛尉卿李延昌
左羽林將軍楊敬述等至冬檢閱且當處團結待後進止其
有先鋒破賊斬馘摧堅功效灼然者並委軍將便定功賞不
須限以常格物管以下者有損失兵馬不能力戰棄軍逃命者
便殺其有棄軍入賊不能死節者妻子依叛緣坐此和

衆誓于師兵統燕犀冀馬之雄屯斬蛟螭繫靈之勇鼓整沸野
旌旗雲豈式遏於河塞方震驚於沙漠於是乎單醪以信
之芳鉅以賞之戮揚千之僕必行其令持獲首之兵不枉其
法堅壁清野則投石而有餘追奔逐北則掃塵而無類俾權
宜於閫外仍布告於天下暫勞永逸在此行焉主者施行

授宋璟御史大夫制

黃門三台副職百寮之師紀綱是任莅事性能國子祭酒上
柱國廣平郡開國公東都留守宋璟含純粹之德稟清剛之
氣學研精以辨政文體要以經遠吉人之寡敷言有訓君子
之慎擇行無違正色而自具陽秋立誠而不慙風雨必能靜
專動直獻忠納規嘗聞沃心之任靡憚犯顏之情使其坐以
鎮俗毅然當朝則不能者退不仁者遠王臣蹇蹇儒夫有立

俾光天憲式副人瞻可御史大夫勲封如故主者施行

授李暉宗正卿制

賈勿隣

門下前弘農太守李暉體正心和操端行潔或政能茂異所
泣必聞或忠孝兼全避權勤讓咸推公議多負卿才官惟真
人用必有適宜欽爾職以弼予教可守宗正卿

授張沛司膳少卿制

李巨山

鸞臺新除齊州刺史張沛禮義高族忠賢令緒才優識通學敏
詞贍實蘊幹時之具雅懷在公之節絃歌出撫亟動於謳謠符
傳所經必聞於課最允稱衣冠之胄是謂廊廟之珍二署為卿九
流莫尚宜迴負海之駕俾登象河之列可司膳少卿主者施行

授崔羣右僕射兼太常卿制

李虞仲

勅僕射貳令之職也奉常正卿之選也假中臺之極攝冠列

寺之崇秩無此兼命必資重賢前荆南節度管内觀察處置
等使銀青光祿大夫檢校吏部尚書江陵尹御史大夫上柱
國清河縣開國公食邑一千五百戶崔羣道合時中識通政
本含五行之秀氣為一代之偉人文學致名公忠蒞職清貞
不撓方廉自持曩昇台階助我憲祖實著贊時之績用存經
國之規周旋累朝揚歷大位出作垣翰入標羽儀風雨有不
已之鳴雪霜無可變之色秉是全德罔聞異詞乃者輟自夏
卿授之戎閩統荆衡之巨鎮嗣羊杜之前聲政推洽平理在
徵復禮樂之器予心所難冀流合雅之音將考依經之制慎
簡斯文會諸乃俞俾廻軍旅之謀式暢人祇之職伯夷官業
行乃脩明可檢校尚書右僕射兼太常卿散官勲封如故

授韓弘河中節度使制

李公垂

門下王者統馭萬寓。緝熙庶政。必有文武全器。柱石之臣。出
壯藩岳。入和台鼎。使其効彰中外。聲播華夷。所居而人心自
寧。所莅而軍令自肅。充是任者。其惟至公。開府儀同三司。守
司徒兼中書令。上柱國許國公。食邑三千戶。韓弘受天地凝
粹之氣。得山川崇深之靈。厚其體而壯其容。虛其心而宏其
量。早洞戎詔之學。久膺節制之權。隱然大梁。克有成績。及功
言盪冠志。展勤王懇申戀闕之誠。竟遂來朝之禮。位高百辟。
榮冠一時。恩極而愈恭。名光而益勵。朕方欲樹以垣翰。仗乎
忠賢。乃騰關河之首。實惟股肱之郡。自昔重寄。無非元勳。是
用命以上公。復茲雄鎮於戲頃。吾東夏父子。偕分闡之榮。今
處近郊。伯仲並登壇之貴。道苟積於忠實。顧何愛於寵章。往
惟欽哉。副我明命。可守司徒兼中書令。河中尹。充河中晉絳
慈隰等州節度觀察。唐實等使散官。勳封如故。主者施行。

授韓愈比部郎中史館修撰制

白樂天

勅太學博士韓愈。學術精博。文力雄健。立詞措意。有班馬之
風。求之一時。甚不易得。加以性方道直。介然有守。不交勢利。
自致名望。可使執簡。列為史官。記事書法。必無所苟。仍遷郎
位。用示褒升。可依前件。

授薛存誠御史中丞制

勅庶官之改。得人則舉。況中執憲。准繩之司。所以提振紀綱。
端肅內外。蓋一職修者。其斯任之謂歟。給事中薛存誠。選自
郎署。列于左曹。居必靜專。言皆謹正。章疏駁議。多所忠益。可
以執憲。立于朝端。況副相方缺。臺綱是領。糾正百官。爾得專
之。夫直而不絞。威而不猛。不附上而急下。不犯弱而遠強。率

是而行號為稱職敬服斯命徃其懋哉可御史中丞餘如故

宋

除呂蒙正中書侍郎兼戶部尚書平章事制

李太初

天道無私日月星辰助其照皇王不宰股肱輔弼代其工所以端拱守成垂衣制理永建不平之景運遐追三代之令猷其有業茂經綸才推謹厚參大政而已淹星歲兼至公而無捨寅昏宜頒出綽之殊恩俾正持衡之重柄爰擇剛日特降命書推忠佐理功臣朝散大夫給事中參知政事柱國東平郡開國男呂蒙正四氣均和五行鍾秀有濟時之略輔之以溫恭挺命世之才守之以循默爰觀舜旌之進善遂指魏闕以未儀臨軒觀敏贍之能射策見縱橫之略暨茲登用益著

謨明公忠推社稷之臣凝重見廟堂之器眷茲大體久鬱其瞻宜作礪之功克懋秉鈞之績別錫褒功之美號仍陞馭貴之崇階勲籍增榮并田加賦預列侯之峻爵同大利之計書顧恩之在茲諒名器之無假於戲璽從龍而風從虎今也其時啓乃心而沃朕心必求諸道爾宜周旋庶政佐佑眇躬緩茲宵旰之憂翊我隆平之運同底于道豈不美歟

韓通贈中書令誥

劉原甫

易姓受命王者所以徇至公臨難不苟人臣所以明大節周故天平軍節度使檢校太尉同中書門下平章事侍衛親軍馬步軍副都指揮使韓通定交霸府委質前朝荷戈共歷於艱貞錫壤迭分於戎律朕以三靈騰祐百姓樂推言念元勳方疇異渥蒼黃遇害良用憮然追升浴鳳之池式表潛龍之

舊。

龍圖閣直學士兵部郎中涇原路經略使王素可諫
議大夫誥

朕臨御天下。賴宗廟之靈。方內乂安。元元蒙福。而徃者戎狄
窺間。緣隙時入。為暴患。皆在守圉之臣。文不能附。武不足
威。敵使貪暴之民。震驚朕師。具官王素。假節剖符。居邊三年。
內鎮撫百姓。外教戰士。令行禁止。惠于鰥寡。爰及疆外。羈縻
之虜。咸懷服集。不失朝貢。中國以安。朝廷益尊。此蕃衛之勲
也。詩不云乎。大邦惟翰。其議遷秩。升于諫列。以慰吏士出車
東山之思。

兵部員外郎張中庸可開封府判官誥

京師衆大之居。其俗具五方。而諸侯所視法也。號稱難治。蓋

自古記之為之。尹者專用。擊斷則綱。俗敬崇之以寬。則成
信不立。故常擇精明。疏通之人。以參其職。具官張中庸。材劇
而用博。行脩而志堅。處煩決疑。必有餘裕。俾贊浩穰之政。當
適寬猛之中。根本之地。爾惟欽哉。

屯田員外郎胡揆除都官員外郎

朝廷鎮撫四夷。以綏中國。貴於息民。而不務佳兵。故常申救
邊吏。毋邀竒功。五嶺以南。蠻夷雜居。其俗剽悍。尤為易動。而
桂州都會也。前通判軍州事尚書屯田員外郎胡揆。承用
詔旨。悉心疆事。終揆之任。恬然無虞。亦可謂善吏。能宣明威
信者矣。夫守邊之患。常在見小利。而不達大體。以侵道。驅奪
之為故。至大沸貽憂。吾民則若揆者。不可以不賞也。稍增其
秩。以示褒寵。

度支郎中李碩可三司戶部

財賦大計一出於民取之寡則用不足然而民逸取之多則用有餘然而民困此三司之難也術不能通輕重智不能調盈虛則吾不以為之僚具官李碩嘗以名字典郡風采奉使敏以為政精於檢下所到而治有迹可紀使之參計耗登贊舉籌策庶可以不傷財不害民乎往即會府毋乏乃事

張昱之可光祿卿致仕誥

朕於群臣進退之際曷嘗不臆然思之方其強仕發智能以濟務則有官賞以懋其材逮其謝歸養志意以自佚則有息渥以寵其行仕宦者豈不雍然得其所耶具官張昱之立節彌峻無淄磷之苟臨事敏明有批導之利恤民以惠屏奸以嚴循吏之風聞于當世自升禁近之列屢委宣藩之重服

晡之言而知止躡踈廣之迹而告老爾其還上官事秩以列卿休于而家尚體朕意

除韓琦依前同中書門下平章事進封儀國公加食

邑實封制

王禹玉

朕按奉高之儀思承上帝之福詠我將之什知配文王之功諏辰季秋之良盡志孝饗之事應一郊之定卜躬三歲之宗祈于時陳物采於國中接神明於堂上璧玉溫潔粢盛令芳靈光燭於大庭休氣蒙于重宇疇相丕祀於顯元臣肆膺拜胙之螯首布告庭之命具官韓琦命世發德佐王矢謀財萬化於物宜熙百工於帝載已任沈機之斷力陳遠馭之圖若歲為霖可以濟天下之旱如易占筮可以判天下之疑責大而智愈深事昭而精猶勉迺先庚之詔靡物備而不嚴維自

昔之文或禮闕而不講使朕得哀六天之對款七廟之靈輯于昭曠之儀顧匪烈文之輔茲庸錫之名壤建爾上公寔廣奉田之腴復敦真食之賦汝為汝聽汝勞汝嘉於戲在福不敵康蓋天有難忱之命於德如弗及蓋民無常懷之心雖朝廷之甚休益君臣之相勅宜興盛治允答靈歆

除文彥博樞密使賜功臣制

天極還樞上通帝位之紀神兵會府內嚴師律之謀朕方出講丕平進經常武雖天下無事思備禦之不敢忘蓋王者有征視安危之不敢忽遠登髦傑資以輔予具官文彥博器閑而深材敏以濟早賁賢人之業實膺聖考之知以忠孝之名形象國之盛節以文武之略輯將相之大猷肆纂命於皇圖迺離憂於喪紀迨終哀戚甫見儀刑屬疆事之方興煩師

之載舉折衝境外方將出憺於王靈收畫幄中曷若坐圖廟勝宜長機廷之務宜符巖石之瞻於戲過餌北戎未厭驕之志再明西夏猶苞狂忍之圖終佇奇勲用恢遠馭

除富弼依前同中書門下平章事充武寧軍節度使

判河南府兼西京留守司事仍賜功臣制

三代處中以裁萬物之化四嶽總外以牧黎民之蕃如山之經九州如股肱之衛一鯨出處之際朕無閒然具官富弼復貫有元蹈中弗勉學幾聖而獨至識造物之未形貴名起於二朝盛德儀于百辟鄉召從於列筵俾進翊於冢司為日尚新何恙靡已未及經邦之務遽陳避位之辭詔雖屢而莫回章甫卻而復至朕無然自念嗟莫能勝既閱勞於政機其聽遂於私佚建彼徐節以殿東郊守茲洛符以保西宅仍位

鴻鈞之貴尚優黃髮之行於職不虞成功專老氏榮名之畏
其旋元吉要義經履道之終雖弗從於吾遊亦自保於而福
三司使禮部侍郎田況可樞密副使

天文三階中躔紫極之輔國事二極右列鴻樞之司維君臣
之謨明有夙夜之基命朕當登進時傑贊襄大猷以導萬微
之中以合九德之會匪至公之進曷羣聽之歸以爾具官田
況器懷闊深業履端厚材適國家表裏之休學貫天人精授
之交而自高賢冊於大廷儀峻遊於清路西垣名命之粹內閣
論思之勤擁帥節于邊而天聲愔於殊俗莞財柄于內而國
用豐於歷年茲庸倚爾忠力之良置諸宥弼之地熙我大業
垂之亡窮噫本天下之兵莫重安危之寄在帝右之陸有若
臣鄰之榮蓋德懋者寵所隆任大者責亦至勉思及瘁永克

承休

除曾公亮檢校太尉充樞密使制 胡武平

經遠慮微必慎制兵之術折衝消難亦資畫策之臣是憲樞
躔聿崇使號蓋政謨之攸寄匪者哲而莫若適得其人誕敷
厥命具官曾公亮夙業碩茂志慮深純學多貫於前言性頗
修於中道有方重之德可以扼躁而鎮浮有明達之材可以
造幾而成務嘗講勸於左右亦召置於禁嚴傳我訓言代予
明命間請臨於宸輔並擢典於京師咸有治功遂聞政本通
明練於百物參和穆於羣言貳公之司又陪於論道內密之
任宜正於筮筮仍加傳導之名更無陪敷之數崇階取重旨食
衍封並示寵章式旌殊禮於戲典機之任莫慎乎微擊柝之
言蓋取於豫勿謂承平之久益思備禦之深祇服斯言往踐

乃位

王元可右衛大將軍遙郡觀察使誥

間制之師蓋威於不若嚴除之術乃備於非常唯中外之送更在倚毗之兼厚具官王元可資沉敏節尚剛嚴少厲武鋒博通軍志幹方授任政優服於蕃方厭難折衝功實施於邊境眷言雍部控于西州委以牙爪之師屯乃襟喉之地苛憲不作部分有嚴閣牘奏之爰來叙足朕之微苦願實環衛乞朝京師須築石之有瘳雖金重而無適忠言可壯誠實不誣朕以拱扈之嚴當資於宿將委以重寄於舊勳等總一連聯司二衛式表疏恩之數且伸從欲之仁惟忠力之是圖亦威名之斯賴體茲優遇更竭乃誠

除文彥博判大名府制

歐陽永叔

朕惟將相之崇資是為文武之極選隆其名器所以重朝佐列于蕃宣所以屏王室矧乃居留之任必屬老成之人爰擇剛辰敷告有位具官文彥博器閑而厚識粹而明學得其方通古今而知要才周於物適大小以惟宜自奮發於聲猷早更揚於中外居則參禪乎國論出則宣暢乎皇威兩踐台司首當柄用賢愚式序舉百職以咸修綱紀甚明贊萬幾而至悉自懇避鈞衡之任出司管鑰之嚴速此逾時蔚然休問眷言邦哲實簡予衷是用更其擁節之榮委以別京之重勁兵所宿寔資總制之權雅俗惟溥兼賴撫綏之政於戲與國同體是謂股肱之良惟民具瞻于隆師尹之望顧我舊德豈煩訓辭往其欽哉祗服休命

西京左藏庫使內侍押班任守信可遙郡刺史依舊

鄜延路駐泊兵馬鈐轄誥

國家自靈夏不賓邊隅多警議者率以謂用兵之道任將宜專息信不久則無以得士心山川不習則不可圖勝筭自兵宿于野久而無功此殆將帥之易之患也苟有能者無據奪焉以爾具官任守信選以敏材臨于戎事肅軍捍寇宣力有聞遽以飛章自言滿歲顧久親於矢石豈不念於勤勞然而士卒之樂既汝安夷狄之情惟汝熟雖欲代汝實難其人所宜旌以郡章仍臨舊部茲委寄服我茂恩

彰武軍節度推官李仲昌可大理寺丞簽署渭州判

官事誥

羣材之在下者思達其上難矣而在上者思得可用之材為易哉朕頃自擇能臣使舉其類

為言琦洙皆能體吾勞於擇士之心者舉爾不應不慎需勿推寵吾所不疑爾尚勉哉以稱茲舉

除呂公弼樞密使檢校太傅制 張方平

本朝之制地分二府之嚴執政之臣共幹庶邦之重文武承以兵民是圖屬在賢明總司使職誕敷明制敷告大廷具官呂公弼器縉純明機靈精遠環材任重中廣夏之棟梁雅音和合清廟之琴瑟登貳樞機之密洽聞議慮之長屢陳憂國之言多發便時之策深明王體有簡朕心宜陞帝傳之崇以正本兵之任爰田增賦負食衍封名器益隆典章允穆於戲信而能用嘗思明哲之難知無不為期盡臣鄰之益祗若休命以贊大猷

除李昭亮殿前副都指揮使寧武軍節度使制

外擁節旄方鎮元戎之重內司禁衛太微上將之雄匪時英
材疇若嘉命圖用親率宜揚大旄具官李昭亮誠稟忠淳風
力敏給世載其德有狐趙之舊勳文定厥祥廼姜任之高姓
早階華顯允陷中和入從法從之華出領翰垣之要屬以軍
政契于士心訓撫有方簡樸允肅著殿巖之離衛悉王旅之
選鋒典茲中權職在圻父特賜節旄之命爰將注意之隆峻
以等威統諸環列於戲齋鉞所付是為王之爪牙蘭錡之嚴
實曰予之心旒勉旃誠報茂對寵休

河北都轉運使工部郎中張昂之可兵部郎中充天
章閣待制三司戶部副使告

唐自開元以還王室多故行在之所不能備官而從軍興之
期顧多應卒之事爰從權便置諸使而天下庶政始不歸於
尚書省今之會府乃在三司蓋自中臺至于寺監之務凡關
出納無不總者故隸其長以始要立其貳以治凡設其政以
治目以言乎三司之副是猶文昌之丞轄助上率下舉綱振
目常出高選以贊大計具官張昂之才識器用政事風采稱
于朝廷著于方面今邊候多警戎車未脫凡物力之充屈繫
生齒之耗登職司版圖必藉精力故謀于衆選爾外臺尚悉
乃心以集吾事

祁國長公主進封衛國長公主制 司馬君實

帝妹中行易象贊其元言王姬下嫁召南美其爾雍命服亞
正后之尊主禮用上公之貴寵光之盛誰昔而然矧同氣之
至親推異數而何愛祁國長公主席靈長之緒承濬哲之祥
稟乾坤之粹和鍾日月之明潤淵懿可度柔嘉有意忘女功

而忘勞承師教而不倦。今玉笄在首，嚴翟戒塗，方結忱於皇家，將執笄於士族，宜疏沫土之邑，俾適富平之孫，庸展茂恩，誕孚醴化。於戲，琴瑟靜好，式昭和樂之音，雷風順承，是爲常久之道，勿以夫家之平素，有虧婦德之聽，從祗服訓詞，永綏福履。

兗國公主降沂國公主制

范景仁

陳車服之等，所以見王姬之尊，啓脂澤之封，所以昭帝女之寵。茲惟親愛之攸屬，特乃化風之所關，苟不能安諧於厥家，則何以觀示於流俗。國公主生而甚惠，朕所鍾憐，故於外家之近親，以求副車之善配，而保傳無狀，閨門失歡，歷年于茲，生事弗順，達於聞聽，深所駭驚，雖然，息義之常，人所難斷，至於賞罰之際，朕安敢私宜，告大庭降從下國於戲，惟爾雍以成美德，惟柔順以輯令名，乃其恪思，朕永來福。

除呂公著守司空同平章軍國事制 蘇子瞻

仁莫大於求舊，智莫食於用衆，既得天下之大老，彼將安歸，以至國人皆曰賢，夫然後用，今朕一舉仁智，在焉，宜告治朝，以孚大號，金紫光祿大夫守尚書右僕射兼中書侍郎上柱國東平郡開國公呂公著，訐謨經遠，精識造微，非堯舜不談，昔聞其語，以社稷爲悅，今見其心，三年有成，百揆時叙，維乃烈考，相予昭陵，蓋清淨以寧民，亦勞謙而得士，凡我儀刑之老，多其實客之餘，在武丁時，雖莫追於前烈，作召公考，固無易於象賢，而乃屢貢封章，力求退避，朕重失此三益之友，而閔勞以萬幾之煩，是用遷平土之司，釋文昌之任，毋廢議論，時遊廟堂，於戲，大事雖咨於房喬，非如晦，莫能果斷，重德無

逾於郭令而裴度亦寄安危罔俾斯人專美唐世

除范純仁太中大夫守尚書右僕射兼中書侍郎制
朕惟朝廷之盛衰常以輔相為輕重若根本彊固則精神折
衝故為呂臣奉已而不在民則晉文無復憂色汲長孺有讓
而守死節則淮南為之寢謀朕思得其人付之以政使天下
聞風而心服則人主無為而日尊咨爾在廷咸聽朕命中大
夫同知樞密院事上柱國高平縣開國伯賜紫金魚袋范純
仁器遠任重才周識明進如孟子之敬王退若蕭生之憂國
朕覽觀仁祖之遺迹永懷慶曆之元臣強諫不忘喜臧孫之
有後戎公是似命召虎以來宣雖二政之與聞疑遠猷之未
光坐論西省進貳文昌增秩元到兼隆異數於戲時難得而
易失民難安而易危予欲

表以汝為假其之姚宋子

欲藏於百姓以汝為息民之蕭曹勉思古人以稱朕意

除呂大防太中大夫守尚書左僕射兼門下侍郎制

朕聞天子有道其德不可得而名輔相有德其才不可得而
見故漢之文景紀無可書之事唐之房杜傳無可載之勳當
時安榮後世稱頌予欲清心而省事不求智名與勇功天維
顯思方啓承平之運民亦勞止願聞休息之期眷予元臣咸
有一德咨爾百辟明聽朕言中大夫守中書侍郎上柱國汲
郡開國公賜紫金魚袋呂大防造道淳深受才宏毅果藝以
達有孔門二子之風直大而方得坤文六二之動父踐右闈蔚
為名臣宜陞左輔之崇兼綜東臺之務加賦進秩寵數益隆
得位與時憂責彌重於戲若古有訓無競維人崔公建中之
風以除吏八百而致裴均元和之政以為士三十而能惟公

乃心何遠之有

鮮于侁可太常少卿誥

奉常之職非特以治郊廟之度服器之數而已國有大政事大議論必稽焉昔魯秉周禮齊不敢謀而晏子太師折衝於樽俎之間國之典常君臣之名分上下守之有死不易則國安而民服朕選建鄉士付之禮樂意在於此非我老成之人學足以通古才足以御今智足以應變彊足以守官深於經術達於人情其孰宜之詩不云乎彼其之子邦之司直徂修厥官無斁朕命

楊繪可知徐州誥

士有拙於謀身而巧於治民踈於防患而密於慮國其自為計則過矣而朕何疾焉先帝龍興首擢用爾置之臺諫以直諒聞言雖無功效於今日簡易輕信失之匪人坐廢十年然自得詩人所謂豈弟君子者繪庶幾焉彭城大邦吾股肱郡政成民悅朕不汝忘

楊王子孝騫等二人荆王子孝治等七人並逐州團

練使誥

先皇帝篤兄弟之好以息勝義不許二叔出居于外蓋武王待周召之意太皇太后嚴朝廷之禮以義制息始從其請出就外宅得孔子遠其子之意二聖不同同歸于道可以為萬世法朕奉侍兩宮按行新第顧瞻懷思潛焉出涕昔漢明帝問東平王家何業為樂王言為善最樂帝大其言因送列侯印十九枚諸子年五歲以上悉帶之著之簡策天下不以為私今王諸子性于忠孝漸于禮義自勝衣以上頽然皆有成

人之風朕甚嘉之其名進一官以助其為善之樂尚勉之哉
母亦乃父祖以為邦家光

韓維父億贈奠國公誥

朕聞仁宗在位之乂有同成康得士之盛不減武宣如儲藥
石以待疾病如種梓添以備器用凡今中外文武之選率
多慶曆嘉祐之人而况一時之老成與聞當年之大政德業
傳於父老儀刑見於子孫名在國史像在原廟朕用慨然相
見其人具官韓維故父億少稟異材進由直道出為循吏入
為名鄉福祿終身而人不訕富貴奔世而天不厭實生三子
翼輔兩朝旌旄交馳榮戟互設朕欲貴其家廟而貴已窮於
人爵改封大國益著隆名庶使昭陵之老臣永為北土之舊
輔

上惠卿責授建寧軍節度使本州安置不得簽書

公事誥

元亮在位民不奠居司寇失刑士有異論稍正滔天之罪永
為垂世之規具官呂惠卿以斗筭之才挾穿窬之智諂事宰
輔同升廟堂樂禍而貪功好兵而害世殺以聚斂為仁義以法
律為詩書首建青苗次行助役均輸之政自同商賈手實之
禍下及雞豚苟可蠹國以害民率皆攘臂而稱首先皇帝求
賢若不及從善如轉圜始以帝堯之心姑試伯鯀終然孔子
之聖不信宰予發其宿姦譴之輔郡尚疑改過稍畀重權復
陳罔上之言繼有碭山之貶反覆教戒惡心不悛驟輕矯誣
德音猶在始悔知已共為欺君喜則摩足以相歡怒則反目
以相噬連起大獄發其私書黨與交攻幾半天下姦賊狼籍

橫被江東。至其復用之年。始倡西戎之際。妄出新意。變亂舊章。刀引狂生之謀。馴致永樂之亂。興言及此。流涕何追。迨予踐祚之初。首發安邊之詔。假我號令。成汝詐謀。不圖渙汗之文。止爲款賊之具。迷國不道。從古罕聞。尚寬兩觀之誅。薄示三危之寬。國有常典。朕不敢私。

李之純戶部侍郎誥

保國猶保身。藥石不如養氣。御民猶御馬。鞭箠不如輕重。故興利以富民。不如省事而民自富。廣求以豐國。不如節用而國自豐。朕嘉與庶工。共行此志。具官李之純。屢試以事。號稱有良。雖爲有司。不吝出納。宜膺躡等之用。庶無虛授之譏。朕

者不計財。惟處之所用。治財者不卹民。惟財之爲富。此古今之通患也。朕知汝才知身。倚忠厚。可信。故以西方之政。責成於汝。往與師守。若謀之。惟適厥中。以民爲本。

殿中侍御史豐稷可右司諫誥

劉貢甫

在廷之臣。位下而望重者。唯諫官而已。爲其得剴切人主。紀綱國體也。然非其學足以達道。其智足以周務。見微而知著。擇善而有容。亦安能稱其事。而宜其官哉。以稷自居憲府。綽有士譽。名不虛傳。材實允副。移珥筆之權。當伏蒲之選。讜言正色。迺其素守。吐剛茹柔。毋愧前哲。則我爲知人。爾號稱職矣。

吏部侍郎胡宗愈可御史中丞誥

權衡之於輕重。繩墨之於曲直。由其無私。而素具是故。應物而不貳。朝廷風憲之任。志讜之士。亦所以素具而待列位也。

命官之艱得人惟允。具官胡宗愈。秉心端直。為學深厚。粹然
行達之姿。淵如有容之度。粵自潤色。綸省獻納。環闈副貳。天
官藻鑒。多士綽有休譽。舉為補職。是宜付中司之權。寄執法
之柄。爾其修習中之誠。應方來之務。有節於內。則物無不察。
以義自處。則動無不中。稱此茂息。著為顯效。

文彥博平章制

鄧潤甫

師傳道之教。訓先王所以迪厥官。老成重於典刑。天下所以
資其智。迺眷舊德。特謂元勳。謀合祖宗之心。名載鼎彝之器。
中放贊策。猶告外朝。河東節度。管內觀察。處晉等使。守太師。
開府儀同三司。太原尹。致仕上柱國。路國公文彥博。數大而
清明。方嚴而信。源出則秉乎旌鉞。入則總我鈞衡。文武兼備。
其才夷險。能致其力。畢公之彌四世。三紀于茲。傳說之總百

官萬邦。其又爵隆無富溢之累。名遂有身退之榮。神明相其
壽康。入心想其風采。是用還之。論道倚以經邦。以帝者之師。
臣謀議。廟堂之上。以天下之大老。制馭夷狄之情。庶幾有為
底于極治。陪敷多并。申衍真封。於戲。呂望惟賢。起佐文王之
治。周公已老。留為孺子之師。矧我耆英。無媿前哲。往宣一德。
用格多盤。

立皇太子制

建儲非以私親。蓋明萬世之統。主器莫若長子。茲本百王之
謀。朕荷天地之沉臨。席祖宗之詒燕。廼瞻上嗣之貴。蚤應前
星之祥。宜告大廷。誕揚丕號。皇子彭武。軍節度延州管內。兼
察處置等使。檢校太尉。開府儀同三司。持節都督。延州諸軍
事。延州刺史。上柱國。延安郡王。溫文日就。睿智夙成。回馳道

之車能止班輪之驚辨南陽之牘允符東海之休自疏錫於
王封益光華於德望勝衣視膳溫然孝友之姿好禮受經不
煩師傳之誨是用感盛陽之嘉日舉列聖之大章登正青宮
肆放顯冊以協離明之吉以係天下之心於戲立愛始親商
以成千歲之業建嗣必子漢以撫四海之民斯為永圖往膺
徽典

除司馬光左僕射制

帥羣臣宿道而嚮方在慎取相佐王者脩政而美國莫若求
人顧惟眇躬獲嗣大統儲思業業不敢忘六聖之休注意賢
賢將以總萬方之治褒進上宰敷告外庭正議大夫守門下
侍郎司馬光受祿高明履道醇固曾足以任天下之重學足
以知先王之言逮事厚陵備儀侍從

列被遇文考權總樞

機之繁有大臣特立之風蹈君子難進之節方予訪落之
起應秉均之求調娛萬幾必先教化之意辨察百職不失禮
義之中是用諮諏僉言褒加異數越陞左揆之路兼峻東臺
之班申衍爰田陪敷具食於戲上富亮於天心則陰陽風雨以
之順下遂宜於物理則山川草木以之寧內阜安於兆民外
鎮撫於四裔蓋輔相者為之基杖而老成者重於典刑勉行
所聞以底極治

除富弼尚書左僕射充觀文殿大學士集禧觀使制

呂晦叔

聖王賦祿所以崇德而勸勞賢者辭隆所以激貪而厲俗眷
我外相惟時宗工願還重紱之榮蓋露尊章之請既重違於
悃幅宜特示於褒優載換剛辰式敷渙號推誠保德崇仁忠

亮佐運綱戴功臣武寧軍節度徐州管内觀察處置等使開
府儀同三司檢校太師同中書門下平章事行徐州大都督
府長史上柱國鄭國公富弼體資忠亮識蘊淵閑炳然濬之
粹靈挺棟覺之厚器光輔仁祖蔚為文武之師迨事先皇實
總機衡之要引疾遽辭於大柄均勞式殿於近邦未移巖石
之瞻併及洪河之潤肆予續紹允渴儀刑雖體力之未平顧
風猷之克壯而乃過持冲守深遜寵名論言已周誠意彌確
朕惟安危所寄雖賴老成之人損益有規宜伸大雅之志俾
進班於左揆聽復節於中臺仍總領於殊庭討論思於秘殿
用彰寵數蓋示眷懷於戲進止不膠其扶於名義幽明有相
終界於壽域風於四方時汝之德

除富弼依前尚書左僕射兼門下侍郎同中書門下

平章事昭文館大學士兼詳經潤文使鄭國公制

鄭毅夫

秉錄膺圖將繼配天之大業銓時論道必資名世之元臣以
言乎體貌則舊德之英以言乎望實則羣材之表爰立作相
宜莫如公丕昭寵數之殊乎告治朝之聽具官富弼智資大
雅德懋碩膚學足以造聖人之微幾足以通天下之變絲賢
科之得雋據遠業以奏功在仁祖時則首冠廟堂有弼諧九
德之美在英考世則再登樞府有折衝萬里之謀庶績已熙
太平將洽屬留侯之多病容裴度以為藩愷悌所宜神明白
復方王家之不造固賢者之有為昔居畎畝而志猶在於愛
君今處朝廷而義豈忘於憂國是用召從方守進拜元台仍
左揆之舊班兼東臺之茂秩爰田衍賦盟府易動茲實重恩

庸昭注意於載上理乎天工。則日月星辰以之順下。遂乎物
宜。則山川草木以之蕃。近則諸夏仰德以承流。遠則四夷傾
風以待命。凡子欲治。惟爾責成。勉盡嘉猷。用光丕訓。

戶部副使太常少卿燕度可右諫議大夫知潭州。蓋
湖湘之南。溪蠻剽悍而易擾。法而馴之。則亦弭伏。至其失御。
遂出而噬。邊其禍亦不細。得無肅又廉治之帥。為之良救者。
或必爾。具官燕度。醇明忠厚。通於世務。更符要劇。芒刃愈出。
裨副大農。厥功茂焉。宜加賜諫議大夫魚符犀節。往甸南服。
內以惠斯民。外以柔殊俗。朕方端宸。面朝以遲爾之奏。譚矣。
除文彥博太師河東節度使致仕制。蘇子由

周公未嘗之魯。老亦居豐。留侯晚雖彊。冷終不任事。蓋委寄
之重。初無間然而止。足之風。所不敢廢。惟我者。舊歷事祖宗。

續服之初。復命以位。雖師保之地。優佚不煩。而丘葵之心。朝
夕以請。布告在位。裨聞高風。太師平章軍國重事。上柱國。梁
國公。文彥博。克孝而忠。允文且武。其在師旅。有方召之勳。其
在朝廷。有宗環之業。士民視其去就。夷狄震其威名。時更四
朝。躬蹈一節。先皇帝愍勞以事。既許其歸。越予訪落之年。適
有涉淵之志。起之既老。待以仰成。出入五年。終始全德。進而
論道。日聞典訓之言。倚以折衝。卒靖邊防之警。委成功而不
處。指莫景以求安。動請屢聞。誠心莫奪。顧瞻閭井。近在洛師。
郭氏有永巷之嚴。裴公有綠野之勝。豈以簪紱之累。久致形
氣之勞。望具極上。公既無復加之爵秩。分領全晉。仍昇久還之節。
旌增廣舊封。益祈貞食。殫盡入臣之寵。歸從父老之遊。於歲
音聲不毀。尚有就問之禮。凡杖以俟。復期親祀之陪。勿以進

退之殊而廢謙猷之言云籍且與禪書而康

蔡確改知安州詔

朕體親大臣務全終始有善則藩飾褒顯以風厲天下有過則遷就諱避以曲全舊恩至於用法蓋不得已而具官蔡確早以才力奮於下脩旋蒙器使致位元宰第碩不類今曾育素而溺於私愛以廢公議曲從與吏之請遂成黷貨之辜其驕奢淫縱之狀理無不知而涵養蒙蔽之甚殆非體國致煩言之並作雖欲宥而不能孰守小邦仍視舊職往自循省尚體至恩

郭達自致仕起知潞州詔

秦伯復用孟明是以能霸蜀人亟誅馬謖終亦無功朕周於用人篤於求舊雖設干羽以懷柔異類而聽鞞鼓則無忘將臣豈其舊勲久廢不用具官郭達蚤學弓劍曉通詩書勇而有謀整且能暇威名隔於西鄙柄任及於中樞南伐無成嗟伏波之遂棄退居能飯知廉頗之未衰擢從解組之餘復寄長民之任過而能改豈一嘗之足云窮當益堅或來切之可冀勉於圖報以稱異恩

范鎮侍讀太一宮使詔

為國無強於得人用人莫先於求舊朕歷選賢俊至於側微患其德望之未充而典刑之未練舍驥驥而不御臨長道以咨嗟人皆病之子何疑者具官范鎮文冠多士有揚雄之遺風仕歷三朝守劉向之忠節蚤事仁祖首開社稷之言晚說裕陵復陳堯舜之道自處以義歸不待年身友漁樵已無求於當世名書簡冊恍或疑其古人茲予續服之初日思講議

之益謂白首窮經之樂尚可推以與人而真祠訪道之遊足使退而養志勉徇予意毋留所安

待制司馬光可禮部郎中制

王介甫

敕左右侍從之臣皆先帝所遺以助興政理者也有勞可錄朕敢忘哉具官某行義信於朝建文學稱於天下比更任使會課當遷進位二等以嘉爾績爾方以經術入侍而又兼諫諍之官徃其思致厥身使朕之聰明無所不通爾亦維有無窮之聞可

李日尊加恩制

朕紹膺駿命稽用上儀祗事郊宮並受三神之福推恩方夏外交四表之歡告于有司錫是在服推誠保節同德守正順化翊戴功臣靜海軍節度觀察處置等使同中書門下平章

事李日尊躬懷德善世濟忠勤真茲南邦居有扞城之效衛我中國使無疆場之虞賜之大將之旄肱之負王之爵往踐厥位知欣戴於寵章來獻其琛用協成於熙事陪敷采邑褒進文階載加貞食之封式允懋功之典於戲人之所助惟恬冒於王靈國以永存願循守於侯度率時新命保乃舊邦

左司諫王陶可皇子伴讀誥

自天子至於士未有不待學而成者今朕欲進諸子於孝求可與居者而大臣以爾為言爾又在諫垣有聞於世茲惟慎選可不勉哉

崔澤刑部侍郎致仕誥

仕焉而告老者自一命以上必有以慰其歸况吾迹臣恩紀所厚宜增位序以示褒優以爾具官崔澤此以明揚久於煩

使入參侍從出備藩維踐更滋多寄屬惟允引年辭位得禮之宜進貳秋鄉以榮居息古之士者非苟自佚其身唯慎行祇法以助成王德爾所知也往其懋哉

參知政事歐陽脩曾祖某贈某官

君子善善之義下及子孫況推而上之至其祖考所以褒美崇寵顧豈可以不稱哉故先王宗廟之制視其爵位之高下以為世數之遠近而本朝追命之禮亦從其子孫名數之卑尊具官歐陽脩曾祖潛于丘園躬有善行畜積之慶施于曾孫為時宗工名重天下圖任以登于右府褒嘉當及其前人東宮之孤位已顯矣進秩一品尚其事哉

曾祖母某氏某國太夫人

尊之欲其貴親之欲其富豈特人主有是心哉推是心以施

於人此人主所以與天下同憂樂之意也祿有厚薄故禮有隆殺位有高下故施有遠近古之道也其可忘哉具官歐陽脩曾祖母含德在躬作嬪令族積善之慶覃其後昆惟時聞孫實朕良弼登豫政事人無間言其疏大邦之對封以報流澤之施寵維靈之極尚克享哉

徐韓琦京兆尹再任判大名府制 元絳

分陝稱 南當公職之尊啟媿就封畢萬得國名之大况吾元老 世宗臣人尚帥垣之嚴宜遷尹節之寵飭宣典策敷告搢紳具官韓琦道醇而深器遠而博渾渾忠孝之業憲憲文武之姿感通仁朝亮衆采於台極翼戴英考捧大明於天衢肆朕續圖厥初謀落燮諧四氣之序熙輯百官之成登昭公槐奄涖國社鎮定大事安如九鼎之安承寧諸侯端若

元龜之信。歲勤再閱。師律既和。重念郊圻之旌。旁據河山之險。徒得君重。以宣王靈。就更西雍之苑。留主北門之鑰。載敦爰賦。并實幹封。於戲。漢咨陳平。安危注於上意。唐用裴度。輕重繫乎厥身。維迺純誠。無愧前烈。懋服休命。徃其欽式。

除韓絳觀文殿大學士知許州制

國家登延。弼疑內以起功。於庶事。圖昇藩翰。外以發政。於四方。閔勞申息。倚重均體。肆專丕號。庸論廣朝。具官韓絳。躬莊厚之姿。函忠忱之度。濟世美以特立。告辰猷而具臧。妻陪國均。實輔台德。嚮自伊。尹之寄。再膺翼亮之姿。高平師師。總脩衆職之采。公孫斤斤。參聽百官之成。久宣于勤。間懇以疾。確辭幾務之劇。祈即燕申之休。感于朕聰。姑徇爾欲。宜還宰該。徃建州。麾陟春官。常伯之尊。燕禁。隆儒之冠。載更功。號增謂。遐其服。寵章以將福履。

范育直龍圖閣知秦州誥

錢勰

古者不以勇猛為邊。貴謀而賤戰。故國家妙選耆儒。類付方鎮。外以訓齊戎旅。而內以息安元元。用此道也。具官范育。才猷智略。夙膺器任。選衆揆材。徃臨帥閫。夫新秦奧區。控扼汧隴。綏懷夷落。應接新邦。無以久安而忘備豫。祇膺休顯。益思報稱。

除燕達武康軍節度使充殿前副都指揮使勳封如

故制

李邦直

祈父之官司。王爪士。上將之任。為國虎臣。予得智勇之材。俾共左右之位。誕敷休命。播告大廷。具官燕達。拔迹戎行。厲躬

武節深明分數之守。兼識變通之權。揮外侮於西陲。佐濯征於南服。嘗鼓儻趨阨。以奮率然。徒能降城艾旗。以盪定通寇。夙付簡稽之籍。進督號噉之軍。人知訓齊衆不譁。教是嚴師律。懼在殿巖。越從廉車。遂總齋鉞於戲。惟威愛足以臨下。惟忠義可以報君。勤懋乃心。欽迪朕意。

尚書祠部員外郎知制誥直學士院孫洙可翰林學士知制誥

以文辭為號令。明諭朕志于天下者。在制誥。陳古今論得失。裨朕之欲聞者。在訪議。二者皆學士職之故。於侍班為親且貴。以爾具官孫洙。繇學術行誼顯進。有名于時。博習墳史。多識典故。代予言訓。蔚然可觀。真秩禁林。使與材補。息寵茂矣。爾慎旃哉。

除范純仁觀文殿大學士知穎昌府制 曾子宣

謀謨廟堂。入則股肱於大政。偃息藩翰。出則師帥於一方。維時宗工。引疾辭位。均逸近輔。敷告大庭。通議大夫守尚書左僕射兼中書侍郎上柱國廣平郡開國公范純仁。端良稟於世資。樂易成於天性。有砥名厲行之志。有面折廷爭之風。越自累朝。變更華選。暨冲人之嗣。服適文母之仰。成咨于臣鄰。付以宥密。一踐樞要。飛秉國鈞。朕恭已紹庭嚮。明圖治。緝熙緒業。追適先猷。方有望於彌諧。遽固辭於機務。重違爾志。姑即厥安。增視秩之榮名。進陪封之寵數。式隆體貌。何吝眷私。於戲。論道經邦。常在倚毗之地。承流宣化。勿忘勸翼之心。祇服朕言。徃共爾位。

徐禧給事中誥

曾子固

有事殿內之臣職在於平奏述詳命令糾其違者而正之覆
其是者而行之至於決獄官人條陳法式之事莫不當攷察
焉其仁可謂重矣其官徐禧以材進接典執邦憲茲用推擇
俾踐厥位惟精敏不懈可以周閱讀惟忠實不撓可以司論
駁朕方觀爾之效爾尚勉於厥修

吳居厚京東轉運副使呂孝廉可轉運判官誥

朕進拔能吏以督視一路蓋州縣政令之舉措公私貨食之
歛散莫不任焉得人之難致擇性慎以爾幹敏閱試惟舊用
是分茲東部屬以使事夫施於民者厚而刑罰請求於民者
約而財用贍使德流澤通而風化輯穆以稱朕憂憫元元而
勵精庶務之意爾其勉矣往服細辭

除曾布右僕射制

曾子開

左右置相以揔吾喉舌之司東西分臺以幹我鈞衡之任若
中如鼎足之峙承上若台符之聯相須而成關一不可廼登
次輔以告大廷左光祿大夫知樞密院事上柱國魯郡開國
公曾布敏識造微懿文貫道器周小大之用智適古今之宜
被神考特達之知亟躋禁從膺先朝倚注之重久執事樞而
能悉心公家宣力夙夜忠以迪上誼不辭難真勤百為壯老
一節肆朕纂臨之始尤嘉翼戴之勞參稽師言圖任舊德文
昌端揆之列紫微陪侍之班合茲寵名作我近弼仍遷階品
增衍戶封於戲朕有休息百姓之心汝則覲文而置武朕有
綜覈庶工之志汝則務實而去華以至甄序材良敦獎正直
澄清風俗振肅紀綱使萬物各得其平無一夫或失其所汝
之職也尚往欽哉

左武衛上將軍郭逵特贈雄武軍節度使誥

念功隱卒國有勳章矧予勞藉之臣嘗慶訐謨之地奄終壽考宜極哀榮具官郭逵少也知書長而其甚武蚤著戰多之績深通靜勝之謀伏波未衰尚咸名之可億營平既老亦籌策之是咨孰云注意之辰忽却云亡之痛聽鼓鼙而增感賜錢鉞以飾終尚其有知膺此異數

正議大夫知鄧州蔡確復觀文殿學士差遣依舊

法始於貴者所以示朝廷之公恩篤於舊臣所以為天下之勸眷吾近弼掌絳微文雖符守之既更顧寵名之尚闕吏民安仰庶陞未尊具官蔡確材術疏遠謀猷庸敏與聞機政自元豐之紀年升冠宰司當永裕之復土屬均勞於輔郡旋視職於殿廡原情無他在法當復尚淹時日以塞人言未忘矜

念之心難廢公平之典備顧問於帟幄稍還近班宣條教於翰垣益思盡瘁

范純禮復天章閣待制樞密都承旨誥

樞機之地選用士人宣納密命自神考始肆予纂服收按端其真諸左右蓋遵先志具官范純禮夷易有守篤實無華恂自持言行相顧失職茲久秉心不移起分州符未厭輿議其還延閣侍從之遽來贊右府訏謨之微副予咨求竚爾忠益

立皇后孟氏制

梁燾

正家者義之先天下從而定矣夫昏者禮之本聖王所以重焉朕繼體持盈側身思永方切基圖之固敢娛宮室之安太母以萬世為心命受宗事之重大臣以兩極陳義請建坤儀

之尊請王道之大所由興故人倫之始不可緩明揚德闕之
懿簡在慈闈之公欽承溫詔之音俾正中宮之位載繡言日
敷告六廷故侍衛親軍馬軍都虞候眉州防禦使贈太尉孟
元孫女忠孝令門善慶奕世幽閑專靜藹聞和聲婉睦惠慈
雅應柔則天作之合文定厥祥人謀協從龜書并言是宜入
聽內職輔宣外和式瞻禘禋之章上直軒龍之象嘉典大備
並行今古之情文盛德有開增美國家之治理於戲惟恭儉
為富貴之守惟憂勤為康樂之資如闕睢之進賢則可以基
風化之成如樛木之逮下則可以將福履之盛用乂乃濟匪
初其難勉爾欽修以法三宮之端一相予顯祀以崇七廟之
清明垂光紫庭襲譽彤管可立為皇后

邢氏進號賢妃制

孫巨源

王宮六寢崇建婦官天極四星垂著妃象所以協宣陰教助
穆宸闈矧視秩於上公必敷求於淑哲朕勵精于治選納充
希嬪嬙靡充位號多闕茲延登於邦媛用播告於路朝婉儀
邢氏德稱後庭體合法相居念保阿之訓動循環佩之音授
弓矢於媒祠占熊罷於吉夢是宜詳案警典并備列祀進參
禴狄之華益昭彤管之煇坐論婦禮正始國風品冠六儀名
超九御於戲周南之詠卷耳無險詖私謁之心齊詩之美雞
鳴有警戒相成之道寵靈烜赫禮秩優隆匪時婉嫕之良疇
若疑嘉之命佐后內治爾尚勉哉

尚書左丞梁肅資政學士同體泉觀使誥

呂陶

君臣之會遇豈不難哉平居竭股肱之効則與之合謀一日

有筋力之憂。則遂欲去位。當從之際。朕甚重之。雖朝廷始終之恩。固無所間。而賢者進退之分。亦貴其全。爰有寵章。以褒遠業。具官梁燾。蘊造道之深識。知事君之大方。早以文學之望。更直於儒林。晚以諫諍之才。盡規於治略。向從內相之選。進領中臺之權。資其納忠。卑此周歲。左綱已舉。知戴冑之有勞。竒論不聞。惜少翁之告病。遽形奏牘。求解政幾。豈却復未。至于五六。爾既懷知止之義。屢請於朝。予亦有優賢之心。敢勞以事。宜踰華於祕殿。仍充職於真官。示以眷存。遂其安佚。惟五福之報德。必錫之壽康。惟大臣之愛君。不繫於出處。其綏言履益茂壯猷。

中大夫守尚書右丞李清臣可太中大夫依前守尚書右丞詔

王震

朕初續承大賚于天下。雖汪洋之澤。所被者廣。要以貴賤。近為先後。淫殺之節。故吾政事之臣。所以褒嘉者。既不敢後。而致隆焉。具官李清臣。秉德含章。將明密勿。先帝圖任。以貳政幾。弼予一人。與有勤績。徽章爰錫。祿秩有加。進陟勳賞。益陪帝賦。終審厥典。爾則有辭。惟予一人。並受多福。

朝請郎權發遣陝西運副葉康直可朝奉大夫再任承議郎權發遣陝西運副李察可朝奉郎再任

朕惟西土弗靖。爾則在行。靡征不從。日月逾邁。典護邦計。實繫厥勞。練達邊機。毋易爾舊。宜加寵陟。申即故封。有叨見知。其說毋斃。

蔡京降太子少保致仕制

張閣

政事所寄。尤嚴設國之誅。人臣之姦。莫重欺君之罪。我有常

憲揚于大庭。太師致仕。楚國公蔡京。頃以時才。久膺柄任。兩
冠台衡之峻。三登公衮之崇。庶圖爾庸。以弼予治。而總秉機
務。出入八年。事浸紊於將。未謀悉違於初議。擅作威福。妄興
事功。輕爵祿。以示私恩。濫錫予。以蠹邦用。借助姻婭。密布要
途。聚引兇邪。合成死黨。以至假利民而決興化之水。託視聖
以飾臨平之山。豈曰懷忠。殆將徼福。屢有告陳之迹。每連狂
悖之嫌。雖僅上於印章。猶久留於里第。偃蹇弗避。傲睨罔悛。
致帝意之未孚。昭星文而申譴。言章繼上。公議靡容。固欲用
息。難以屈法。宜褫師臣之秩。俾參宮保之官。聊慰羣情。尚為
寬典於戲。天事尚象。明罰所以弭災。人道惡盈。省躬所以引
咎。往欽善貨。無重後愆。

西京左藏庫副使高允元

章察同知樞密院

使誥

沈文通

不德。亦將吏不戒不自之罪。心以深察。往
失而推擇。所遣益不敢輕。惟爾文質材。以志勇。更事有勞。故
令以爾物。摠一道之兵。戍于邕管。又陞爾。諸使之正。以重其
行。爾其祗聽朕命。戒疆事。習軍計。使南徼無警。而朕為知人
則時乃之功矣。其往欽哉。

西京左藏庫副使高允元可文思副使誥

武吏以材勇進。以功力賞。古之制也。方天下無事。兵革不試。
則汝武吏安得自效。以取賞哉。然內外之職。歲月之勞。亦不
可遺也。今允元最狀。既應陟法。其增秩一等。以明勸羣吏。

章察同知樞密院誥

鄒志完

朕惟天下治安之本。實在二府。故文武雖若異任。而眷注未

嘗不均必求其人。以贊樞極。具官章案受知哲廟。擢付師權。既生致於首蒙。且廣恢於境土。屢形捷奏。數被褒嘉。眷宥密之須才。越班聯而登用。蔽自朕志。寵示殊恩。惟不忍肝腦之塗郊原。故能愛重人命。惟備見飛輓之耗帑廩。故能謹惜邦財。事在變通。爾知之矣。勉思所以善其後者。以副朕躋民仁壽之意。

呂希哲直祕閣知曹州誥

祕閣聚天下之圖籍。以崇養蒙。英以監觀。理亂惟時。分直不輕授人。以爾學知所宗。行與言稱。方從鄉寺出。輔藩垣。茲用褒嘉。以為爾寵。夫濟陰患盜久矣。以爾之不欲而表勵之。則雖賞之不竊。將不時見於空言而已。徃其懋哉。

元

翰林承旨王磐贈官制

王之綱

崇德報功。恩靡忘於先正。易名節惠。禮具載於彝章。故翰林學士承旨資德大夫知制誥兼脩國史領集賢院事致仕王磐。志大以剛。識明而遠。惟根本培植於內者。確乎不拔。故英粹發於外者。煥乎有文。出處無愧於心。窮達不易其守。潛知逆黨。星言發青社之謀。明斥權姦。露奏重紫微之柄。出于藩則用。蘇民氣入視草。則允契宸衷。贊大議於廟堂。播清芬於簡策。諫止東伐。奮不顧身。請復外臺。毅然抗疏。是以皇帝篤褒嘉之眷。昭考垂飫賜之勤。正有待於乞言。何屢陳於謝事。榮歸梓里。朕衍椿齡。朕方嗣服。於丕基。天不憖遺於一老。追惟徃行。惕用興懷。俾超進於孤鄉。仍具頒於寵數。於戲。千古

淵源之學。茂以踰脩。一生忠義之心。諒無愧軼。願二賢已膺於美謚。而兩字宜媿於前休。精爽如存。歟承不昧。可贈榮祿大夫。少保謚文忠公。

左丞董文炳贈謚制

李槃

折衝禦侮。誠社稷之良臣。崇德報功。實國家之令典。途雖殊於生死。禮當極於哀榮。故資德大夫。中書左丞。僉書樞密院事。董文炳。王佐之才。將家之子。自出宰於劇縣。嘗入侍於潛藩。山路間關。謁戎輅。遠趨於六詔。風濤洶湧。奮龍舟。首渡於三江。迨予嗣服之年。委以專征之任。截彼淮浦。至于海邦。招降兩浙之新民。撫定七閩之故地。大小數百戰。奮不顧身。勤勞三十年。厥有成績。徃者睢陽城下。父已歿於兵鋒。出來揚子橋邊。勇復終於王事。一門忠孝。萬古芳香。及茲幹事。而回

方以不次而待。何言中路殲我良人。蓋非鄉孰佐於朕躬。而獨朕悉知於鄉意。弗煩異數。曷慰永懷。其陞一品之榮。以賁九泉之隧。倘其有識。歆此無窮。可贈金紫光祿大夫。平章政事。謚忠獻公。

太保劉秉忠贈謚制

臣以忠孝而事上。貴輸獻納之誠。上以禮義而待臣。恩篤始終之愛。視死之日。猶生之年。故光祿大夫。太保。參領中書省事。劉秉忠。學窺天人。識貫今古。遂冲而有守。安靜而無華。昔侍潛藩。稔聞高論。適當三接之際。懇上萬言之書。蓋將舉天下而措諸安。以戒為人主者。果於毅。朕嗣服而伊始。卿盡力以居多。蓋得卿實契於朕心。而獨朕采知於卿意。事皆有驗。人匪他求。周旋三十年。不避其難。剴切數百奏。各中其理。共成

庶政方圖任於舊人誰謂旻天不怒遺於一老與言及此何
日忘之載惟台輔之尊厥有泉扃之貢是用錫之綸命峻一
品之華階祿以衮衣躡三槐之正位復加顯號允荅殊勳惟
爾英靈識予哀寵可贈儀同三司太傅謚文貞公

加封孔子父母制

謝端

闕里有家系出神明之胄尼山請禱天啓聖人之生朕幸觀
人文敷求往哲惟孔氏之有作集群聖之大成原道統則堯
授舜傳之周文王論世家則契至湯下逮正考甫其明德也
遠矣故生知者出焉有開必先克昌厥後如太極之生入地
如鉅海之有本源雲仍既襲於上公之封考妣宜旃夫素王
之爵於戲君子之道考而不繆建而不悖予以敦典而叙倫
宗廟之禮變其所親敬其所尊予以報功而崇德尚篤其慶
以相斯文齊國公叔梁紇可加封啓聖王魯國太夫人顏氏
可封啓聖王夫人

御史大夫相嘉碩利封謚制

列爵之等以馭貴孰加於諸侯王元勳之胄而象賢宜膺於
三錫命云胡歿瘁之蚤重予蠶傷之懷故榮祿大夫江南諸
道行御史臺御史大夫相嘉碩利鍾純美之資負經齊之客
粵若廼祖相我世皇始成混一之功未受顧託之命襲其善
慶惟時聞孫不階父師之訓而忠孝夙成篤於君臣之誼而
夷險一致居給舍則伏蒲而抗論司宥密則彊本以折衝河
汴交流分廟堂之重寄東南都會長端憲之崇班皆能綏輯
士民肅清綱紀甘棠之愛遺澤猶新喬木之家清風未憖夫
既世濟厥美而不天假之年繫淮陽之故圻爾先世之胙土

廼啓封而陞秩仍節行而易各具之贊書曰貫于幽壤於感霖
雨舟楫之用雖不究於當時河山帶礪之盟尚益昌於爾後
美奭未遠服茲寵靈可

左丞許衡贈官制

姚端夫

天非繼聖學之墜緒則不生命世之大才因欲與王道以比
隆肆用為烝民之多覺何物故之已久尚人思之未忘故資
善大夫中書左丞集賢大孝士無國子祭酒教領太史院事
許衡王裕而金相準平而繩直出處則惟義所在言動亦以
禮自持休休焉有容屬屬乎其敬人能弘道惟朝聞夕死之
是期我欲至仁匪晝誦夜思而不得行已似秋霜烈日化人
如時雨和風來席下之樞衣滿戶外者列屨達簡在帝心者率
不失善良鶴鳴九臯而志聞至高風

翔千仞必德輝乃下爰立相以堯君舜民之志所告上皆伊
訓說命之言丹袞斥茲少不避雷霆之軋擊青臺治曆本於
筮日月而送迎繇理窮而智益明隨任使而職斯舉今既亡
矣誰其嗣之於孱在爾身有垂沒世之名於朕心有失同時
之恨雖成廟納書以命謚固已振木鐸之高風而功臣胙土
則未加用申錫密章於下地光靈如在寵數其承可贈正學
垂憲佐運動臣太傅開府儀同三司追封魏國公仍謚文正
元帥烏野而封謚制

惟太祖之基命龍逐乘雲有良臣以樹勳魚猶得水展我同
姓豈伊異人故金紫光祿大夫北京等路兵馬都元帥烏野
而氣鍾光嶽之純全誠貫金石之堅確智足謀國勇則冠軍
佐天運之維新憤人心之未定既降復叛必煩以行故自北

而徂南首遼尾魏亦攘左而塞右膺齊背秦語其跋履於四方數豈戎衣之百襲為庸已懋其報宜豐可當非劉氏之不王姑啓若魯侯之大宇併申褒典少慰英靈噫佳城之鬱年三千名固已昭乎白日分國於肇州十二澤期不斬於黃河可贈某官追封營國公謚忠勇

元帥紐鄰贈謚制

朕聞率土之臣莫如同姓干城之將尤可異恩故遠稽於禮經用厚加乎愍冊具官某某在弱冠嘗為選鋒迅與鷹揚號為萬人之敵虓如虎視隱然千里之威厲鉅寇之及郊之總戎之制閫求可居此孰有異然其為人心所歸不待君命之至推使秉鉞辭拒循墻即下令於轅門已折衝於尊俎握機旗建四川之草木知名開壁鼓行三峽之星河動影勇頗牧

之非匹策孫吳之可方入阨危則應衆所不先分賜與則如士之最下勁勳所感堅城每摧如斯宣力於兩朝何止出音於百戰嗚呼降年弗永為烈則多雖狀不及識之亦心未嘗忘者置戶以守何樵牧可侵馬鬣之墟故壘即封或魂魄猶思營叢之國可贈某官追封蜀國公謚忠武

丞相阿塔哈封謚制

臣為委質勞於同軌之間國以念功恩及祿衣之後雖飾終其時有所未及在追恤今日烏可或遺愛寵幽褒用昭異數故光祿大夫江西等處行中書省左丞相阿塔哈力齊獄負量與川涵託開國將種之苞根擬明堂工師之大木受任閭外賈勇籌邊為憲宗入蜀之前鋒因殘百粵非世祖投江以尺箠不返三苗報效之私寤寐不置百其身以奚恤一廼心

之是期會師征險順而貞得夫剛決柔之兆考版圖之幅裂
秉旄鉞以鼓行將削尊號於偏方必使義聲以先路勢乘破
竹名正包茅有不待陣風蛇之蟠而已飛塵星駟之捷如震
如怒社金華北方之強于理于疆盡江漢南國之紀群黎壺
漿而崩角幼主席藁以泥頭瘁事匪伊成功能爾凡十年為
承于行省奄一旦滄世於先朝白雲杳歸于青山清風空遺
於黃閣像未麟臺之貌服先龍袞之升既進師垣又建王國
傳大書於神路過若式焉示絕等於臣鄰忠斯勸矣尚膺茂
盛少慰營魂可贈推忠翊運宣力功臣開府儀同三司太師
上柱國追封順昌郡王謚武敏

丞相塔剌哈贈謚制

出入帷幃在人十能而已則千計謀廟堂為相一年而矣居

平竟邦家之殄瘁宜王禮以追崇故開府儀同三司中書右
丞相監脩國史太保太子太師知樞密院徽政使中政使宣
徽使左都威衛指揮使塔剌哈維昔開國之遺苗乃今太師
之元嗣由爾世胄為我親臣事世祖至今也凡三朝職食官
而久者非一日灼其廉明而忠亮與夫恭遜而溫文眷茲中
書出庶政之原居以右相絕百僚之席使加中政機總六軍
善調護而長宮師監纂脩以成國史如此重責皆所裕為一
德可以寬鄙夫片言奚止簡繁務思過榮之可懼視倖利以
不貪同縮銀艾者十人爾先辭免其太尉均受錫田以萬畝
爾獨還致於司空觀父子之並相一門求聖賢與尚友千古
改為改作緇衣何賴乎武桓拜後拜前赤舄未慙於周魯方歌
功於清廟倏委魄於玄閭豈意少者沒而老者存益信神難

明而理難測。憐乃公獨傷於漠北。誓爾後均胙乎淇陽。嗚呼。何但上下床。盡餘子可束之高閣。如失左右手。慨正人不作於下泉。咨爾靈明。歆朕休命。可特贈封謚為懷忠昭德佐治功臣。開府儀同三司太師上柱國淇陽惠穆王。

封宣聖夫人制

虞伯生

我國家博典禮以彌文本。闔門以成教。迺睠素王之廟。尚虛元姪之封。有其舉之斯為盛矣。大成至聖文宣王妻并官氏。來嬪聖室。垂裕世家。籩豆出房。因流風於殷禮。琴瑟在御。存燕樂於魯堂。功言貌若於遺聞。儀範儼乎其合德。作爾褊衣之象。稱其命鼎之銘。噫。秩秩彝倫。吾欲廣闕。惟鵲巢之化。宣皇文治。天其興河圖鳳鳥之祥。可特封大成至聖文宣王夫人。

光祿大夫平章政事大司徒徽政院副使領將作院事張九思贈推誠翊亮功臣開府儀同三司太傅上柱國魯國公謚忠獻制

趙子昂

功存翊衛。睠惟先正之臣。國有彝章。式舉追崇之典。宜頒異渥。以賁重泉。具位寬厚。有容質直。好義早逢。熙運位登。喉舌之司。逮事春宮。身任羽翼之寄。屬奸臣之作亂。閉宮門而弗開。倉猝之間。忠節可尚。太皇知其謹慎。委任盡其始終。世祖疇其勲庸。爰置諸其左右。天下誦司馬光之字。朝廷推萬石君之風。從容乎廟堂。密勿乎禁近。鞠躬盡瘁。弼亮三朝。正笏垂紳。夷險一節。謀猷方資於啓沃。疾病遽得於勤勞。雖沒世之有年。亦懷賢其無已。是用封之東魯。達于上公。三司同開府之儀。八柱表承天之力。示崇德報功之澤。極生祭死哀之

情於戲朕惟圖任舊人天不憖遺耆老九原莫依一品斯崇
夫推賢盡誠之謂忠賢德有成之謂獻合茲節惠以著嘉名
咨示英靈朕予寵命可

平章廉希憲贈謚制

元復初

惟我世祖皇帝肇自藩服受鉞專征天賚良弼為之左右一
家四海傳次在手各爵之崇顧斯實勦故榮祿大夫中書平
章政事贈清忠粹德功臣大傅開府儀同三司追封魏國公
謚文正廉希憲清忠粹德文武元臣蚤以門閥之賢入膺寄
託之重非詩書不陳於上前非仁義不行於天下憂國忘家
愛民如己西靖秦蜀東極青齊北清遼碣南鎮荆湖在中書
者曾幾何年而能立大法銷大患進大儒摧大姦耻身弗及
伊周耻君未邁堯舜言其賢之所難為人臣之不敢疑然三

代之佐蓋將師表百世者矣天不憖遺哲人先萎雖諸子列
官省臺於朕心猶懷舊德是用進以極官加之上爵於戲表
賢能所以尊朝廷也假名器所以報忠貞也稽若王章得茲
二美凜乎生氣天地猶存服此殊榮尚開爾後可加贈推忠
佐理翊運功臣太師開府儀同三司上柱國恒陽王仍謚文正
樞密趙良弼贈謚制

昔聖祖歸自武昌啓皇元始於中統天人胥贊宗感叶從無
何僭逆之餘輒作陸梁之態誰其將指先二使以遘征事則
從權果群凶之畢殄與言及此軫念久之資善大夫陝西等
處行中書省參知政事趙訓父僉書樞密院事良弼才周度
務而洞察其幾學貫三才而不滯于用既輸誠于佐陝亦盡
瘁于行東撤蓬成之藩籬淨織氛于雲棧易弁裳而冠帶渺

一介于滄溟凡危衝■煦之突來必大義純誠而自處故平生之偉績恒簡在于宸衷宥密八年險夷一致謙謙素履具見于典刑婉婉良善每資于匡翼賜第之留未久引年之請彌堅雖房喬不忘秦府之游而李泌雅志嵩陽之隱在今日孰堪倚重顧舊臣寧復如卿特示崇褒查申異渥於茲迪世以章平之訓有蔚其華疏封於趙魏之才所憑者厚朕將示勸卿其欽承可特贈推忠靖運功臣太保儀同三司追封韓國公謚文正

中丞于璋贈謚制

善人天地之紀德莫有加君子邦家之基歿猶不朽瞻懷遺直追錫殊封故資德大夫江南諸道行臺御史中丞于璋志蘊忠貞運逢熙洽慶雲甘露氣和而動植自宜威鳳祥麟瑞

應而猛鷲咸伏結深知于世祖參大政于武皇澄清每振于憲綱動靜允維于國體逮朕嗣服召卿來廷賜以繡衣執法應中端之象專茲白簡行軺寬南顧之憂遽何馳計之聞盍有崇褒之渥於戲劉寬長厚允宜居鼎彝之司胡廣中庸謂當又臺閣之任事率徃古息慰九原咨爾營魂服我休命可贈推誠肅政功臣光祿大夫平章政事上柱國追封薊國公謚文簡

平章張珪封蔡國公制

吳澂

天地之間有正人國家恃以為元氣卿之忠盡朕所眷知此因疾以祈閑爰加恩而優老榮祿大夫中書平章政事張珪尋常世闕廊廟宗工早摠戎旃已作禮樂詩書之帥朕司化軸遂稱文學政事之臣左右六朝出入三府險夷不易其守

鯁亮以如其初。太清惟薄食之昏。前期致沐浴之請。越予新服。嘉乃舊勳。諤之節。詎肯詭隨。侃侃而言。類多裨益。黷雖謁告。奭尚勉留。俾辭執掌之勞。專整格心之學。緬惟先正。嘗平金壘。以立功。宜得後昆。復就蔡封。而襲爵。所謂改國庸建。上公思竭。爾忱廣敷。陳於經幄。欽承時命。永翊贊於皇猷。可封蔡國公。提調經筵事。

丞相阿里海牙贈謚制

王構

朕惟不世之主。膺不世之運。非常之人。立非常之功。方一統之宏開。有六師之分董。鄂漢順流而下。勢甚建瓴。荆湖堅壁者多。事猶掣肘。儻弗資其雄畧。其何莫于遐方。故光祿大夫湖廣行中書省左丞相阿里海牙。端慤而䟽通。聰明而果銳。蔡廷久侍簡眷。良深朝政。參知弼諧。有賴。遭明時。建長策。機

決于十年之先。殄餘孽。芟群凶。威行于萬里之外。下江陵。以爲之根本。破長沙。以潰其腹心。外梗咸除。率虎旅。平吞于桂海。降旌隨豎。故龍驤直抵于錢塘。猗惟徽袞之加。煥若雲章之諭。錫賚榮多。于貴近。勞還位亞于侯王。忠於國。惠於民。靡不用其至也。報爾功。崇爾德。孰能與于此哉。雖當年左揆之特升。顧今日彝章之未舉。佇遂圖形之制。彌深撫髀之思。爵首冠于台司。封乃䟽于藉國。曰武以旌其戰伐。曰定以著其和平。名則易之期百千世。禮之同者。惟一二臣。於戲。周宋爲鐔。石城爲鋒。朕仰繼皇王之。大武。黃河如帶。泰山如礪。卿允爲宗社之元勳。尚冀英靈永言歌格。可特贈佐平南紀。宣力功臣。開府儀同三司。太師。上柱國。追封楚國公。謚武定。

丞相答剌罕贈謚制

予欲宣力四方所賴人才之叶助天不憖遺一老其何治化
之成能故中書右丞相哈刺哈孫荅刺罕嶽瀆英靈乾坤間
氣執德弘而信道篤提身正而格物深判宗寺無示恩威奠
藩封于磐石之固坐廟堂不動聲色措天下于泰山之安位
不以內外為重輕事不以險夷為去就廓神明之藹有空皆
通推惻隱之心靡寬不釋惟獎善疾邪之大甚故積憂成恙
以相仍言仁義如魏文貞寧恤儉嗟之巧沮佩安危若韓忠
獻詎容神器之它攘刃游于批大郤之餘器別于遇盤根之
際離網未綴一誠堅抗群器泰運重開百慮竟如素策顧嗣
基之伊始其佐命者惟御載績武功出膺遠境駒介不煩于
屢駕衣佇俟于來歸云胡馳計之聞遠爾輟朝之慟雖
之所守匪生而存匪死而亡然政有或疑奚究而問奚取而

決詢之輿議揆以舊章貞王超異姓之封顯秩冠上公之貴
治典教典並以褒崇東平廣平罔不專美嗚呼國家之講制
度一二臣式克似之天理之在人小百千世不能易也永言
孚格以啓方來可贈推誠履正佐運功臣太師開府儀同三
司上柱國追封順德王謚忠獻

平章史弼封鄂國公制

嗣德罔不在初粵彝章之具舉舊人不克遼省疇備績之特
書榮祿大夫平章政事議樞密院事提調諸衛屯田事史弼
器博而用周志剛而行敏早經禁禦出總戎行矣明無本乎
天資方略悉合于古法視長江如履平地居然獲跳盪之功
撫疲黎猶保推嬰允矣著緩懷之效始自淮襄之百戰迄于
嶺海之同風顧宣力之獨多其推誠則弗替終始三朝之著

賜環屢歷于宸班。優游六藝之文。綬帶雅稱于儒將。是宜責之
華綬。行以真封。以酬既往之勞。以示惟新之渥。於戲。以臣圖
象。恭蓋冠於褒公。元老壯猷。忠向資於方叔。益圖報稱。祇服
訓言。可特加銀青榮祿大夫封鄂國公。

翰林承旨姚樞贈謚制

昔有先正。蚤事聖皇。惟夙夜昭。厥心。而終始典于學。如伯益
之贊夏禹。暨尹躬之佐成湯。仁乎仁義之途。任其社稷之重。
計于廟堂之上。明夫事樂之。心蓋精神志意之相孚。故終天
都俞之靡間。制雖拘于一例。忌特侈于屢書。故翰林學士承
旨中奉大夫詳定禮儀使贈榮祿大夫少師文獻公姚樞。以
淵識弘謨。為國著蔡。以清靈素檢。為時楷儀。曉萬事安異。同
式群工。言統畧周旋。必禮溫溫。維德之恭。敷納以言。蹇蹇匪

躬之故。止殺允符于宸慮。豈呼不應于天功。以故終和且平。
近者親遠者附。不賞而勸。大法。小臣。庶國家之表裏。可觀。
風俗之振。機隨轉。績已成而加有身。愈退而彌尊。履當時者。
壽其誰歟。致今日隆平者。公正事正言。正道親傳。文祖之
燕謀有德。有功有能。首被先之鴻訓。肆朕纂承之始。於公
簡注之深。槐序延登。衣仍衮棠陰未徙。朕廼龜蒙。因謚以
正其名。崇章以介其祉。於戲。天下賢材。斯足矣。方圖政化。
之新有。朝廷大議。則就之。慨相儀刑之舊。往歛效命。以求其
傳。可加贈嘉猷。程世。舊學。功臣太師開府儀同三司。追封魯
國公。仍謚文獻。

留守段良贈謚制

蕭司留務。漢高隆端本之規。毒作共工。虞舜由有邦之訓。

聖皇之在御稽往古以建官惟時亮切朕其疏濬通奉大夫
大都武衛親軍都指揮使司達魯花赤提調大都屯田事大
都留守兼少府監段國幹故父銀青光祿大夫司徒武衛親
軍都指揮使司達魯花赤大都屯田事提調大都留守司少
府監事貞際身隆之運效乃所長嬰通敏之休善於其職端
莊恪慎周密疏通心休休焉如有器渾渾兮靡可限卜潤
溥食惟洛犧首定於遷都象天漢之宮勳履善于考室應
叢機則曲當奮奇略以無前審勢以材六司之事異矣攻金
刮玉一器而工聚焉歷華賁凡十六階翼皇基于億萬載慨
生存之莫復宜褒謚之兼崇以衍封腹以疇勤濟於戲紫微
丹闕非徒示壯麗之威鯁論直言無復見典刑之舊尚其英
爽式克欽承可特贈效忠宣力功臣大傅開府儀同三司上

社國定封安國公謚武宣

追封孟子父母制

張士觀

朕惟繇孔子至於孟子百有餘歲而道統之傳獨得其正雖
命世亞聖之才亦資父母教養之力也其父夙喪母以三遷
之教勸天下後世推原所自功莫大焉稽諸往代實闕褒崇
夫功大而位不酬實著而名不正豈朕所以致懷賢之意哉
肆頒寵命永賁神休可追封其父為邾國公母為邾國宣獻
夫人

中丞崔或贈謚制

獻可替否治獲佐於明時崇德報功禮宜加於卹典故祭祿
大夫平章政事御史中丞領侍儀司事崔或山川間氣簪紱
名家俾司綿絕之儀繼被瀛洲之選靡繇一介之助自結九

重之知遂擢置於秋卿俄紀綱於柏寺奏寢宮嬪之議罷征
日本之師章疏可方之古人摺紳無出其右者擅生殺之柄
忍容義庸之姦抑聚斂之臣力止延齡之相兩過文昌之府
嘗僉宥密之司于琴瑟更張之初贊七鬯主噐之決屬元貞
方大有為之日適先帝重申執法之官視左右何以易趙堯
在朝廷不可無汲黯薦耆儒而備顧問崇名教以渙絲綸活
人命於頃刻之間回天威於雷霆之下以去留繫憲臺之輕
重辨邪正公天下之是非凡可以尊主而庇民曾不避犯顏
而直諫慨話言之尚在想風采之如存亦孚于休以昌厥後
可贈推誠履正功臣太保開府儀同三司追封鄭國公謚忠
肅

平章李廷贈謚制

混一之期有開于真主恢攘之寄允賴於忠臣其器博則用
迺周其才全則效斯著顧奏捷獨多于群帥而疇庸豈限于
尋章故榮祿大夫平章政事議樞密院事提調諸衛屯田事
兼後衛親軍都指揮使李庭宣力襄樊振威嶺海南師干之
歷試俄斧鉞之升崇劔敵萬人縱橫制變衝當一面出入如
神納之牛腹而獲生載賈登陴之勇敵以馬韉而捷鷲疇爭
執訊之能其韶鈴動合干音賢故聲烈特聞于今日至于扈
聖祖東除僭孽所向無前翼先朝西奠遐陬其猶克壯決策
于未然而策無遺者審幾之先見而幾則灼然緬懷熊豹之
姿忍聽鼓鼙之奏生也加封之弗逮名焉節惠以為宜於戲
黼冕拒圭昭其文昭其度玉符麟節傳之子傳之孫精爽如
存寵光無斁可特贈推忠翊衛功臣儀同三司太保上柱國

追封益國公謚武毅

封周子為道國公制

霍希賢

蓋聞孟軻既沒道失其傳孔子微言人自為說諒斯文其未
喪有真儒之間生濂溪周惇頤稟元氣之至精紹絕學於獨
得圖太極而妙斡萬化著通書而同歸一誠俾聖教燦然復
明其休功尚其不泯朕守成繼體貴德尊賢追念前脩父稽
盡典已從廟庭之祀盍疏鄉國之封於戲齊月光風想清規
之如在玄衮赤帝異寵命之斯承

許衡為懷孟教官制

楊果

咨爾許衡天資雅厚經學精專大凡講論之間深得聖賢之
奧受罰者恐陳君所短為盜者畏王烈之知所在向風真堪
正俗可令於懷孟等處選揀子弟俊秀者舉歸教育取作範

模再令董子惟前有傳授之弟子重使王通門下皆經濟之
名臣母喪斯文以弭予治

加封孔子制

閻子靜

蓋聞先孔子而聖者非孔子無以明後孔子而聖者非孔子
無以法所謂祖述堯舜憲章文武儀範百王師表萬世者也
朕纂承丕緒敬仰休風循治古之良規舉追封之盛典加號
大成至聖文宣王遣使闕里祀以太牢於戲父子之親君臣
之義永惟聖教之尊天地之大日月之明奚聲名言之妙尚
資神化祚我皇元

追封伯夷叔齊制

蓋聞古者伯夷叔齊逃孤竹之封甘首陽之餓讓爵以明長
幼之序諫伐以嚴君臣之分可謂行義以達道殺身以成仁

者也昔居北海之濱遺廟東山之上休光垂乎千載餘澤被
於一方永懷孤峻之風庸示裊崇之典於戲去宗國而辭周
粟曾是列爵之可縻揚義烈以激清塵期於世教之有補可
追封伯夷為昭義清惠公叔齊崇讓仁惠公

丞相伯顏贈謚制

天下大統不嗜殺則一之聖主弘功蓋必資於賢者昔在至
元之際方隆混一之期有來命世之奇材懋建殊常之偉績
故太傅開府儀同三司錄軍國重事伯顏崆峒孕秀列象
精居政府則不動聲氣措泰山之安東戎律則純乎仁義
時雨之降當其聲鶴浦渝盟之罪總龍驤飛渡之師克廣
祖好生之心允獲宋人誠服之意衣冠不改市肆不易恩
於三吳車書以混文軌以同聲教遂單於百粵逮朕

於戲 誠永懷社稷之宗臣宜修河山之高
報斯亦至矣可贈宣忠佐命開濟功臣太師開府儀同三司
追封淮安王謚忠武

丞相阿朮贈謚制

邊外開邊四達弗庭之域將門出將三持分閫之權緬思百
戰之勞宜用九原之賁故光祿大夫中書左丞相兼都元帥
贈開府儀同三司太尉追封并國公謚武宣阿朮英才聞世
勇略邁倫當先皇大理之征佐廼父雲南之役靖蠻荒而平
交趾拔襄漢而下江南為瘴揮戈萬里若枉席之上龍驤飛
渡三吳歸掌握之中贊成混一之圖式副元勳之號按禮寺
易名之典加王章異等之恩於戲青史屢書諒騰芳之有永

黃河如帶尚流慶於無窮可加贈推誠宣力保大功臣太尉
開府儀同三司上柱國追封河南郡王謚武定

丞相線貞贈謚制

蕭曹翊漢素非閥閱之家房杜匡唐卒乏鈞衡之嗣眷先朝
之碩輔綿累世之芳猷永懷弼亮之賢庸示褒崇之禮太傅
錄軍國重事開府儀同三司中書右丞相監脩國史完澤之
父故光祿大夫中書右丞相宣徽使線貞稟靈河嶽者象星
辰應明良千載之期萃忠孝一門之慶梯天力競元戎奠鷄
首之郊扶日功高奕葉應龍飛之運惟昔中書之草創歷陳
治古之宏規位望冠於百僚利澤施於四海躬承世祖肇隆
中統之不圖子侍裕皇復贊元貞之初政方倚具瞻之重宜
昭先德之華維垣進秩於上台列爵仍疏於大國錫號著勲

庸之偉易名申節惠之文殊恩允出於朕心卹典非由於汝
請表南宮雲臺之像旣彰異渥於宗臣措天下泰山之安抑
助貞勤於上宰尚服休命永播英聲可特贈宣忠保德佐理
功臣太師開府儀同三司中書右丞相追封秦益國公謚忠獻
丞相和理霍孫贈謚制

北方間氣寔生命世之材黃閣清風蓋出登瀛之選慨英靈
之已徃當卹典之崇頒故光祿大夫中書右丞相和理霍孫
派接元勳慶鍾全德早躡鰲峯之首誕披雲漢之章開闢賢
關為司徒而敷五教更張化瑟位冢宰以統百官恢揚累世
之洪休新美至元之大政掄才如崔祐甫之廣潔已有張忠
定之剛著績熙朝旣闡文明之治疏封列國宜居禮義之鄉
可贈保德協謀佐理功臣太師開府儀同三司追封齊魯國

公謚文忠

丞相史天澤贈謚制

劉元

周制以八統詔王必先敬故漢官以列爵馭下亦自報功古
 有彝章朕茲申勸故開府儀同三司平章軍國重事中書左
 丞相史天澤性真貞亮器宇沈雄自開國以將三軍妙契淮
 陰之略至分茅而推千乘甚高孤竹之風況結知於累朝迨
 總戎於四紀及朕纂承之始克膺輔相之良內秉國均無筦
 機于右府外清邊陲幾授鉞于齊壇可謂威惠之交孚抑亦
 忠勤之備至繼以荆蠻之蠢重煩汴省之趨惟時壯猷行策
 功而飲至不圖晚志遽引年以謝歸申言齒德之尊端愈典
 刑之益命開府弟協贊廟謀方就佚于尊壘復遺憂于邊關
 其資備筭用一遐陬顧上游之濟師方倚坐籌之勝愴中途
 之病革莫收卧護之勲弗飾庶終曷旌迺績宜表出群之行
 進登符六之階於戲國步方新天不憖遺于一老閔章加祿
 知其永賁于九原營魂有知歆予異渥可贈開府儀同三司
 大尉謚忠武公

許衡妻敬氏封魏國夫人制

鄧善之

魯國有真儒寔弘宣於道統周南得淑女必肇正於人倫肆
 予社稷之臣夙有閨門之化爰旌令則特示崇褒具官許衡
 妻敬氏性靜以貞行恭而順自職君主饋孝克奉於旨甘逮
 貴被展衣儉猶親於澣濯惟我宗工盡贊襄之道由爾內助
 秉柔正之儀雖善慶之報方來而哀榮之典未稱庸視茅封
 而進秩式頒芝檢以疏恩於戲夫婦相敬如賓亦既追榮於
 借老公侯必復其始尚其啓迪於後人

丞相拜住贈謚制

袁伯長

八柱承天棟橈萌於巨構六龍御日輻說見於中街愍死難
 以成仁攷生祭而錫命故中書右丞相拜住鼎彝王社闕闕
 相門自結主知應雲龍之異遇獨持國是炳著蔡之先幾陳
 於上者不足言見於事者為可則斥聚斂之臣以靖四表誅
 黷貨之徒以正庶官庫無餘財拔葵之訓靡替門絕私謁懸
 衡之鑒益公天下望其治平朝廷以之模楷然盡言招過儉
 謀愈深選賢與能奸黨滋懼變成肘腋禍起股肱山嶽動搖
 日月昏翳雖元兇正罰足明朕心在貞惠易名姑慰卿意分
 茅故壤增爵維垣噫未明入朝竟墮承宗之計盛服假寐孰
 為鉏麇之賢念此盡傷恩斯優渥可贈清忠一德佐運功臣
 太師開府儀同三司上柱國追封東平王謚忠獻

平章不忽木贈謚制

盧亘

朕凝命穆清式觀天造將啓靖邦之嘉運必生名世之大賢
 挺出類拔萃之次具存尊主庇民之學使其君臣同德夙夜盡心
 協贊機衡融景化入瞬息之頃深謀廊廟致太平於期月之
 間禮樂以之而興陰陽由之而順序昔聞其語今見其人
 故昭文館大學士坐祿大夫平章軍國重事行御史中丞不
 忽木明允篤誠溫文庶讓研精聖道得先儒淵秘之傳藻勵
 忠規承世皇簡注之渥存膺器使編歷清華殫物洽聞而守
 以正經德迪慮而不近名屬熙朝更化之初開明堂垂拱而
 治升君台鉉俾罄訏謨一澄奇弊之源大洗姦諛之迹事至
 立斷言為天下之公知無不為才實王者之位攬群材而並
 進理萬變而不疑弘以聖衷誕宇辰告翊先帝履尊之際輟

文獻通考卷一百一十一

元臣分陝之行，弄入乎小鈞，遽聞辭疾，彌綸軍國，閱勞機務之煩，提挈憲綱，坐見朝廷之肅，儵號隆福之僊，馭旋驚梁壞而山摧，寧不百年遂亡一鑑，備觀規摹之盛，可謂社稷之臣，肆予撫軍，言還懷茲懿德，當宁而嘆，恨不同時，圖高密於雲臺，丹青罔既，詠裴度於立禱，柱石徒衰，是用寵以帝傳之崇，賜以周公之履，庸起具臣之勸，允為儒者之光，繫爾英靈，歆茲明命，可特贈純誠佐理功臣，開府儀同三司，太傅，上柱國，追封魯國公，謚文貞。

太史令王恂贈謚制

王繼學

洪惟世祖，致治三代之一，總攬群英，得人一時之盛，碩儒既往，郵制宜加，故嘉議大夫，太史令王恂，雅德端方，醇資淵懿，學邃天人之秘，運親神聖之逢，嘉謀嘉猷，有則入告于后，先

知先覺，文將下被于民，參儲闈調護之勳，聞政機密之奉，望重漢廷之園綺，職專堯典之羲和，改曆授時，日月星辰之順軌，崇術造士，詩書禮樂以移風，太平立邦，家之基正，節折姦邪之氣，朕承景命，爾不同朝，比觀嗣子之陳，深切思賢之感，章披雲漢，識裕皇籍，學之初誓，指山河啓昭代，新封于後，華躋公袞，謚易佳名，於厥元氣，所憑不存，亡于生死，九原可作，尚哀榮于始終，罔昧其承，以昌厥續，可贈推誠守正功臣，光祿大夫，大司徒，上柱國，追封定國公，謚文肅。

御史觀音寶贈謚制

李端

見危授命，乃臣子之至忠，崇德報功，寔國家之令典，表茲奇節，沛以新恩，故監察御史觀音寶，以才大夫為真御史，蚤給事于宿衛，每供職于諫言，殫輸向日之誠，益厲飛霜之列，實

對奏疏欲竭力以回天密邇姦人竟交讒而臺國互激雷霆
之怒誤罹斧鉞之誅雖死以猶生諒無善之不報於戲紫
垣垂象正執法於星石青簡流芳永爭光於日月尚期貞魄
服我寵章可贈資德大夫御史中丞上護軍追封漁陽郡公
謚貞愍

丞相伯顏祖考封謚制

宋誠夫

元宰立功懋贊千王之運大廷敷號紹開奕世之封流窮
源積善必慶故中書右丞相伯顏祖考故千夫長阿刺沉毅
而彊力忠勤而小心從役忽禪奮蛇矛而深入扈征蜀道裹
馬革以長終賢勞氣著於生平陰隲益隆於身後天開神聖
闢中土而大同地隔江淮獨東南之未下迺生孫子一我寰
區肆加今敷之隆用極深宗之典位既登於師傅秩並進於

階勲胙土分茅易名節惠予以舉公朝之憲度予以嚴私室
之丞嘗於戲王父抱孫事業誕敷於闕閱天子建德恩光未
賁於幽潛尚其有靈服之無斃可贈推誠佐理翊運功臣太
傅開府儀同三司上柱國追封淮安王謚武康

丞相卜憐吉台封河南王制

程鉅夫

撫帝業之艱難爰思將帥啟功臣之盟誓宜及子孫咨爾在
列聽予作誥開府儀同三司河南江北等處行中書省左丞
相卜憐吉台智明識遠心廣氣和勲名克篤於前人藩翰久
勤於外服昔將平於內難朕大投艱方深計於中途卿獨決
進志存弼亮身佩安危所謂社稷之臣蓋享尊榮之報乃復
煩於機務非示寵於忠良是用命汝襲諸侯王以長守於富
貴歸丞相印以自養於壽齡既不遠於京師可以時而朝覲

董望坐鎮一方於戲表河之南念茲乃祖乃父為國之
屏敬哉有土有民求建厥家毋棄朕命

會通書大成卷百三十七

